


明

書

二







明 書

(二)

傅 維 麟 纂

明書卷九

本紀七

景皇帝本紀

帝諱祁鈺。宣宗次子。母賢妃吳氏。宣德三年八月三日生。十年宣宗崩。英宗卽位。二月冊爲郕王。正統十四年八月英宗北征爲監國。土木駕陷。己巳皇太后命上攝輔皇長子見深。庚午上御午左門。左都陳鑑等合奏王振罪狀。朝臣摔捶死。指揮馬順等執振姪山誅之。并夷其族。辛未封楊洪爲昌平伯。命官安撫畿內軍民。遣官分守居庸紫荊白羊口。石亨封武清伯。督京營。廷臣交劾。扈駕官下顧興祖等於獄。諭拒北來一切黃紙文書。榜示擒敵賞格。罷各處車船收鈔。取南庫內軍器備用。皇太后命于謙爲兵部尙書。丙子羣臣以國籍長君請皇太后立上爲皇帝。九月戊寅皇太后詔曰。皇太子幼冲。未能踐祚。理萬幾。郕王年長。宜早正大位。安國家。癸未上卽皇帝位。詔改明年爲景泰元年。大赦。遙尊英宗爲太上皇帝。進陳循高穀商輅彭時並直文淵閣。召邊將孫鏜等赴京。敵也先遣使致書。辭悖慢。于謙進防禦方略。上嘉納之。宥顧興祖楊洪石亨於獄。御史李著上書稱上曰殿下。自稱曰下官。召入上曰。御史醉耶。著曰。今日宜聲罪致討。迎還主上。而先據大位。失藩王禮。上遂殺之。癸巳皇太后命以金幣至上皇處。報郕王卽位及

立皇太子日月。召安遠侯柳溥於廣西。廣東賊黃蕭養作亂。辛丑。敕各邊召募壯士。陞李鐸爲都指揮使。使迪北奉書上皇。并遺也先書。冬十月。上皇在迤北。敵也先悉衆擁上皇至大同。知府霍瑄出見。獻鵝酒。上皇密諭固守也。先使來議和。遂入寇。京師戒嚴。詔列侯諸將文班大臣分戰守。及監軍。敕尙書于謙總督各營兵馬。命石亨總帥京城內外兵馬二十二萬。命孫泰守倒馬關。申嚴各營軍令。敵破紫荆。孫祥走死。白洋口兵潰。通政使謝澤死之。敕促各鎮兵將入援。戊午。上皇次蘆溝。致書三。一奉慰皇太后。一致上。一諭羣臣守城力戰。己未。敵焚三陵祭器。擁上皇登土城。索大臣出迎。各鎮兵次第至。敵薄德勝門。于謙石亨擊破之。斬其弟那孩。孫鏗戰西直門。斬其先鋒。敵益兵圍鐘。毛福壽高禮來援力戰。禮中矢死。石亨率兵至。敵引退。王敬武興等復戰彰義門。卻之內官爭功躍出陣亂敗走。武興死之。援兵大合。乃去。敵攻居庸。楊洪擊卻之。壬戌。敵擁上皇還掠良鄉。進石亨武清侯。欽天監正彭德清匿天文不報。誅之。楊俊襲敵於居庸。走之。遇楊洪軍復戰。走石彪。又破之於清風店。甲子。上皇出紫荆。止各藩及遼東勤王兵。召楊洪入京。撤各城門文臣回任理事。辛未。修三陵祭器。塞居庸以西山口。十一月。上皇在迤北。詔南直浙江造盃甲九十萬。逮斬逃陣及各關失守官。甲申。詔天下宣府參將紀廣追擊敵。收所掠而還。進楊洪爲侯。安撫各處流移。分派各鎮守參贊監軍官。脫脫不花遣使獻馬。賜賚有加。增巡河御史爲四人。頒詔朝鮮盡免畿府稅糧。十二月。上皇在迤北。尊皇太后孫氏爲上聖皇太后。母賢妃吳氏爲皇太后。立妃汪氏爲皇后。册太子生母上皇嬪周氏爲貴妃。徙上皇后錢氏居仁壽宮。定郡王喪禮。止有司致祭。不遣官分

諸將爲三大營。以石亨、楊洪、柳溥統之。選翰林爲講讀官。敵入大同。擊卻之。鳳陽流民煽動。撫定之。衛經歷袁斌自請入塞問慰上皇。廣州圍急。敕急進討。仍調兵益之。乙亥。上皇書至。初令京府寄牧。

景泰元年庚午。春正月上。皇在迤北。選河間東昌達官往貴州勦賊。分廷臣協守紫荆諸關隘。開納粟入監例。築城天壽山南。勒邊將出塞守堡。癸未。上皇書至。廷臣請遣官北進物物。上以有稔識。上皇者行。羣臣俱謝罪。繳奏。事遂寢。丙戌。遣使祭告諸陵。及闕里。歷代帝王山川。益兵討沙尤賊。閩賊破清流。徐溝妖人王文簡伏誅。閏正月上。皇在迤北。嚴逃軍令。凡官校緝捕者。許爲辯理。停兩京文武官食鹽。下都督孫鏜於臺獄。尋釋之。初開經筵。增築紫荆關城。及倒馬關內城。大同總兵敗敵於沙窩。再敗之於栲栳山。封登定襄伯。京城外立墩瞭望。二月上。皇在迤北。戊寅。耕籍田。命石亨爲鎮朔大將軍。率兵鎮大同。楊能往宣府。悉召各銀場官還京。增南京堂上官各一員。罷三品以上各舉所知例。朝鮮貢馬。壬辰。太監喜甯伏誅。招避寇逃民復業。三月上。皇在迤北。敵犯朔州。都督杜忠邀破之。官土木死事諸臣子有差。討廣賊勝之。敵分道入宣府。禦卻之。停採野味。敕諭安南占城息爭。大賞卻敵將士。募民納米。岷王榷薨。夏四月上。皇在迤北。召浙江撫鎮官還京。大同兵擒虜酋虎察。召王驥還京。都督董興破廣州賊黃蕭養。餘黨悉平。大同總兵許貴請許敵和不許。分大將屯兵鎮易。涿。通。真。保。五月上。皇在迤北。敵犯山西。貴州兵征苗走之。解平越圍。設紫荆倒馬。白羊三千戶所。敵入宣府。朱謙戰卻之。石彪破敵於威遠城。副使陶成征蘭溪。賊戰死。予贈廕。阿剌知院貢馬請和。賜書諭之。六月。運臨清糧三萬於紫荆等處。立京營團操法。戮左都

督楊俊於市癸酉。廷臣請因敵求和。遣使迎上皇。令更議。勿貽後患。敵入大同。郭登擊卻之。丙戌。敵擁上皇至大同。郭登設伏邀駕。不果。敵驚遁。大同參將許貴等破敵。敵犯懷來。于謙進守城。圖阿剌知院請入貢。許之。也先使至京師。秋七月。上皇在迤北。遣禮部侍郎李實等同敵使如迤北。敕可汗及也先脫脫普花王入貢。瓦剌使來議和。貴州賊阿趙伏誅。瓦剌使乞遣同往大臣。令俟李實還再議。右都御史楊善等偕瓦剌使出塞慰安上皇。癸亥。侍郎李實及也先使把禿等至自瓦剌。願送上皇還京。廷臣懇請奉迎。令李實方回。楊善已去。不須再遣使臣。李實及廷臣數請迎上皇。令詳議之。瓦剌使把禿還。敕諭也先還大駕。廷臣請以李實同往。不許。城臨清。己巳。楊善至塞營。庚午。見上皇。辛未。敵餞上皇。八月癸酉。上皇發迤北。太常寺卿許彬往宣府奉迎。辛巳。敵衆送上皇至野狐嶺。辭去。以五百人入護行。是夕蹕宣府右衛。壬午。宣府都督朱謙及其子以兵迎。癸未。上皇命寫罪己敕。諭文武羣臣。仍遣祭土木陣亡將士。甲申。商輅出迎。乙酉。駕入居庸。遣使諭避位。免羣臣迎。丙戌。上皇還京。遜位南宮。頒詔大赦。加楊善左都。餘陞賚有差。晏送駕北使。甲午。上晏北使於南宮。九月。上皇在南宮。武清侯石亨世襲。封朱謙撫甯伯。脫脫普花王使使入貢。冬十月。設京城內外捕盜武臣。修復獨石等處邊城。也先遣使三千人入貢。命嚴備之。十一月。兵部侍郎孫原貞進討溫處叛寇。擒斬賊首陶得二等。江西重行均徭法。也先使歸。賜書賞賚。諭敵使悉還所掠人口。償以綵幣。荆王瞻峒請朝上皇。不許。十二月。有司請賀上皇正旦。不許。停提學憲臣。二年辛未。上皇在南宮。春正月。始命科場官親屬迴避。大覲考察。保定伯梁瑤等討湖貴蠻。屢破之。翰林

學士周敘請復常朝面奏議事制不許。二月幸太學也。先入貢。皇后命瘞戰亡骸骨。三月策士賜柯潛等進士及第出身有差。選吳匯等二十五人爲庶吉士。總督貴州王來率兵平香爐山。擒其酋王韋烈等。餘黨悉就撫。遣官獎賚之。賑江北諸郡。夏四月禁軍職理民詞。詔顏孟子孫世襲五經博士。命大臣賑陝西。敵犯宣府。命諸將勒兵以備。脫脫普花王入貢。五月諸大臣屢請報使也。先不許。有司屢請賞給。從之。徵天下軍器輸京師。六月戊辰朔日當食不食。頒詔安南。秋七月詔于謙子授千戶。辭不許。妖僧趙才興及蔚州妖人王伯通伏誅。辛巳復午朝舊制。復國師禪師供養。初用御史印馬。九月定午朝。許翰林官先奏事。申明奪情起復之禁。冬十月敵遣使通好。求我使往報。詔絕之。閩浙盜平。中書舍人何觀言。大臣如尙書王直、胡濙等皆阿附權奸老猾。不宜在左右。又言北敵來歸。宜置南方。上命杖謫之。減巡河。停捕盜御史。減京師稅課也。先貢馬三千餘匹。十一月均湖州田稅。廣通王徽、煤等通苗。廢爲庶人。十二月加也先使人左都督等官。選官軍十萬分五營團操。壬辰也先弑其主脫脫普花王。有司請朝賀上皇。不許。三年壬申。上皇在南宮。春正月詔舉才行優長下僚。及隱逸。與罷廢官立連坐法。罷納粟補官例。免廣平糧二萬有奇。于謙請討也先。不許。二月撤天下追馬官也。先敗脫脫來獻捷。督還開平。逃避家口。三月敵犯廣甯。禁會飲。命錦衣探訪。賑徐州饑。夏四月廣西都指揮使繫獄論死。黃璠請易太子。命廷臣會議。乃請立見濟爲皇太子。上欲易太子。恐廷臣不從。命太監王誠等先啗內閣。及諸大臣金寶。命廷臣俱兼東宮官。五月甲午立妃杭氏爲皇后。廢皇后汪氏居別宮。立上長子見濟爲皇太子。廢皇太后所立皇太子。

見深爲沂王。上次子見清榮王。見瀋許王。大赦天下。頒寶羣臣有差。復黃瓊原職。尋陞都督。六月。岷王乞徙封。不許。秋七月。命大臣分行天下。考察官員。九月。京官兩俸停其一。築沙灣隄。閏九月。復開處州銀場。冬十月。召王來梁瑤還京。也先入貢。仍奏求使臣往來及緞匹。不許。邊報也先欲入寇。敕于謙。石亨嚴飭待戰。十一月己未朔。日有食之。壬午。見瀋薨。都督楊俊請大伐寇。于謙奏止之。十二月。立團營。定布按仍三品以上京官保舉。餘吏部推選。敍征苗功。進保定伯梁瑤爲侯。餘陞賞有差。

四年癸酉。上皇在南宮。春正月。遣官如暹羅吊冊。撤捕盜御史及官校還京。也先遣使入貢。自稱大元天勝大可汗。議以復書稱瓦剌王。從之。改各處鎮守侍郎爲巡撫都御史。二月。湖廣盜復起。仍命王來。梁瑤討之。巡撫羅綺討松潘。破黑虎砦。平之。乙未。皇太子見濟冠。減近侍日給酒肉價。乙卯。故皇太子沂王見深冠。三月。賑山東。夏四月。五月。王文憂去。詔均應天等府官民田。命御史從巡撫理事。尋罷之。上密止徐有貞爲祭酒。六月。福建民鄭懷胃等作亂。捕平之。停武職納荳陞官世襲例。秋七月。仍命尙書石璞治沙灣。決河。八月。召大同總兵定襄伯鄧登還。九月。定會試同考用科第官。不許取教官同考。王文起復。冬十月。貽書瓦剌可汗也先。也先入貢。自改元添元。元年。使臣幾二千人。十一月。皇太子見濟薨。謚懷愍。遼東報警。禦卻之。十二月。瓦剌貢馬。

五年甲戌。上皇在南宮。大觀考察。命大江以北安撫軍民。三月。策士。賜孫賢等進士及第出身有差。選丘濬等十八人爲庶吉士。賑順天河間饑民。都御史馬昂擒廣賊僞將軍周鐵等。夏四月壬午朔。日有食。

之。貴州兵大破四川草塘賊。擒其首黃龍等。播州平。定私茶比鹽法例。大隆福寺成。擇日臨幸。太學生楊浩疏諫。罷行。五月。安置谷庶人齊庶人眷屬於南京。禮部郎中章綸。御史鍾同。請復東宮。逮下獄。秋七月。給事中徐正請出故太子沂王於國。增高南城。伐其樹。錮門鎖。上怒。黜爲雲南經歷。御史高平請伐南宮樹。上命盡伐之。南京大理少卿廖莊請問慰上皇及上皇諸子講學。不許。八月。頒君鑒錄於羣臣。冬十月。巡撫四川羅綺以鄉人告受番金罷之。籍其家。雲南送思機發等伏誅。

六年乙亥。上皇在南宮。春正月。初命太監班佑鎮守兩廣。馬昂破瀧水賊。三月。命舉到人才。非經學者。吏部自考。夏四月丙子朔。日有食之。霍邱妖民趙玉山伏誅。遣官冊封琉球。五月。運河濬功成。六月。處州盜亂。平之。閏六月。授朱熹裔孫樾爲五經博士。秋七月。黜御史不職者十二人。八月庚申。杖廖莊。章綸。鍾同。莊謫驛丞。綸。同死杖下。九月。授程頤裔孫克仁。周敦頤裔孫冕。俱爲五經博士。冬十月。免山西糧十萬有奇。益孔廟贍田。

七年丙子。上皇在南宮。春正月。于謙病。上遣興安往視。藥需竹瀝。上親幸萬歲山伐竹製之。二月。定天下秋鄉試增額。庚申。皇后杭氏崩。諡孝肅。營建壽陵。三月。許五經博士劉祿世襲。夏四月乙卯。思任發子思卜發入貢。祈宥。平定州妖人趙能伏誅。六月。沙灣隄成。秋七月。封吳安爲安平伯。裁天下添設官一百六十七員。八月。大學士陳循。王文子鄉試落。奏劾考官劉儼。黃諫不公。上特賜循子英文子倫爲舉人。許會試。九月。湖廣苗叛。命兵部尙書石璞率兵討之。冬十月。命聘崇仁處士吳與弼。十一月。削甯府護衛。十二

月癸亥上不豫。

八年卽天順元年丁丑春正月己卯羣臣請立東宮上命卽日視朝不許庚辰上大漸內外憂懼王文與太監王誠謀取襄世子爲東宮事漸洩僉謂故太子宜復位惟王文不然李賢因問蕭鎡鎡曰旣退何復文曰今第請立東宮事在朝廷衆遂覺有異謀越明日辛巳文武集左掖門公請蚤建元良左都蕭維禎曰更建字爲擇字何如奏上不許朝廷傳文謙已遣人齎金牌取襄世子禮部復集百官請故太子復立商輅草疏略云天下者太祖太宗之天下傳之於宣宗陛下宣宗之子見深宣宗之孫以祖宗之天下傳之於孫此萬古不易之常法疏入未報壬午武清侯石亨等左都御史楊善等毀南宮門牆見上皇遂共掖駕前導升奉天殿登御座先是有旨十七日視朝羣臣皆入有頃南城呼譟震地來羣臣相顧愕然須臾鐘鼓大鳴上皇復卽皇帝位羣臣遂入賀上聞伏枕問曰何爲左右曰上皇復辟矣上頷之曰吾兄也好好是日遷上於西宮二月乙未以皇太后誥廢上復爲郕王癸丑薨於西宮壽三十諡曰戾禮如親王葬金山成化十一年十二月尊諡上爲恭仁康定景皇帝稱景帝陵

史官贊曰英宗轅北國無主無主則亂帝逢多難爲之主乃能任賢選將使危如一髮之宗社轉而爲治南征北距天柱弗搖雖臣之功帝可謂明於知人者矣英宗不復腴然於天下臣民之上而帝卒傳位皇太子雖古誼辟何以加焉卒之聽鐘聲則曰吾兄好悲夫然而焦勞固圉神器有歸厥功豈細哉

明書卷十

本紀八

憲宗純皇帝本紀

帝諱見濡。初名見深。英宗長子。母貴妃周氏。於正統十二年十二月二十日庚寅。生於宮中。赤光騰耀。若旌旛。時海宇清稔。己巳。英宗北狩。景皇帝監國。奉皇太后命立爲皇太子。已。景皇帝卽眞。奉英宗爲太上皇帝。逾年。英宗歸居南宮。上侍皇太后居坤甯宮。雖幼。岐嶷如成人。讀書卽悟大意。景泰三年。輒立其子。遂廢上。改沂王。英宗復辟。上還東宮。越明年。出閣講讀。初名見深。至是。詔書更今名。失言其故。海內驚疑。久之始定。上廣額豐頤。威容如神。英宗每撫之曰。此太平天子。福德非吾所及。天順八年正月十七庚午。英宗崩。乙亥。上卽皇帝位。詔告天下。大赦。改明年爲成化元年。丙子。尊聖母皇后錢氏爲慈懿皇太后。生母貴妃周氏爲皇太后。壬午。太監牛玉奏。下侍讀學士錢溥於獄。詞連朱奎、韓雍等。降罰有差。番使貢馬三千匹。賚之。釋羅綺。給還人口田宅。二月。命營山陵。大賚文武將吏。釋孫繼宗、石彪等爲民。癸未。上大行皇帝諡號。門達有罪。謫戍。召袁彬掌錦衣事。頒詔外國。戊寅。傳陞各衙門官甚衆。三月。減供用物料十之三。梧州蠻亂。放免宮人。廷試癸未。秋。補試貢士。賜彭教等進士及第。出身有差。選李東陽等十八人爲

庶吉士占城入貢。大學士李賢奏嚴宮禁。時番僧有入大內講經者。西番寇甘肅。宣城侯衛涇都御史吳琛分道率兵討之。俘斬七千餘人。畜物二萬有奇。南京吏部侍郎章綸奏言。諒陰不可行大婚禮。待百日。夜不報。兩廣賊大起。禁請賜寺額。四川賊流劫銅陵。內江諸州縣。夏四月癸未朔。欽天監奏日食不見。下天文生賈信於獄。命內官十二人坐營。命刑部進士同見任官問刑。番賊入岷州。命給事中童軒往四川撫賊。五月庚申葬裕陵。遵遺詔免殉葬。自此定爲令。朝鮮入賀。復郭登爵。鎮守甘肅屯順聖川。六月禮部左侍郎兼翰林學士致仕辭瑄卒。贈尙書諡文清。秋七月遣官分祭諸陵。闕里。歷代帝王陵。山川壬申立。皇后吳氏召郭登還。八月詔修英宗實錄。初開經筵。項忠捕番降之。九月廢皇后吳氏。詔曰。先帝臨御之日。爲朕簡求賢淑。已定王氏育別宮。乃內臣牛玉等朦朧奏請。將已退吳氏冊立。德不稱位。是以請命皇太后黜吳氏。仍遵成命冊立王氏爲皇后。正牛玉罪。貶南竄。傳言後宮先有擅寵者。吳后杖責之。故有是命。后父俊戍登州。免運軍輸耗四萬有奇。增生員廩米。大察京官。冬十月立皇后王氏。革迎駕奪門功。太平侯張瑾以下爵職。初立武舉法。十一月初立宮中莊田。敵數犯宣大延甯。復設京衛武學。四川妖賊起。延及襄鄧。都督何洪戰死。十二月傳陸道士爲真人。始定朋合折買馬匹法。馬死者軍五民四合買補之。滿除文武官罪過。詔天下。命正統十四年以後功封者不準世襲。

成化元年乙酉春正月。釋戍邊陳循江淵等。并王文子宗彝。于謙子冕等。還給家產。遣官祭于謙墓。虜李來貢。都督趙輔佩征夷將軍印。率列侯征兩廣蠻。韓雍贊軍務。戊辰西域諸國來貢。忠順王母弩温答失。

力來貢。命御史二員約東南征軍士。二月。拂提進擢烏卻之。甲午。遼東破敵。上耕籍田。三月。虜孛搆三衛入遼河。邊將禦卻之。初。命撫治荆襄流民。丁巳。上幸學行釋奠禮。建承天門。免陝西延安糧八萬有奇。夏四月。減孔氏子孫田租三之二。遣錦衣官使西域。虜脫脫犯邊。獲磔於市。荆襄賊劉千斤等反。五月。命撫甯伯朱永。尙書白圭。征劉千斤。猺賊陷南平。四川賊平。召諸將還。六月。革太平侯張瑾。興濟伯楊琮爲指揮官。秋七月。贈卹兩廣死事官。免天下軍衛屯糧十之三。丁巳。疏錢法。嚴自宮禁。官兵獲湖廣賊首苗蟲蝦。兩廣賊入江西。監生廖世傑率土兵敗之。賑南北畿。浙江。河南饑。八月。敵入河套。安南入賀。癸卯。玉牒成。九月。革甯夏河渠提舉司。禁陝西河南取鑛。冬十月。四川兵攻賊砦大破之。給三氏學印。兀南帖木兒乞農器。許之。敵犯延綏。趙輔。韓雍大破大藤峽蠻平之。

二年丙戌。春正月。復三品舉薦例。壬戌。皇長子生。韓雍班師。二月。定納荳贖罪例。敵入慶陽及保德。三月。策士。賜羅倫等進士及第出身有差。選林瀚等二十四人爲庶吉士。封趙輔武靖伯。大學士李賢奪情。辛亥。冊萬氏爲貴妃。停納米入監例。朱永。白圭大破荆襄賊。閏三月。銅鼓苗亂。討之。賑淮徐。命韓雍分勦廣西賊。夏四月。倭寇浙東。荆襄賊平。召白圭還。兩廣賊平。五月。鄭王瞻埈薨。六月。免天下屯田子粒十之三。荆襄賊首石和尙入四川。復亂。命彰武伯楊信佩平虜將軍印。如延綏討賊。秋七月。敵入甯夏。安南入貢。套虜深入固原。定納馬贖罪例。授于謙子冕千戶。九月。西番入貢。免太原等處糧二十萬有奇。冬十月。擒石和尙等。賊平。免叛人疏族連坐法。十一月甲午。皇長子薨。平虜將軍楊信擒斬獻俘。大修陝西城堡。十

二月尙書白圭起復。

三年丁亥春正月廣西餘孽作亂命韓雍勦破之進撫甯伯朱永爲侯毛里孩寇大同命撫甯侯朱永爲平胡將軍率兵禦之二月丁酉朔日食旣毛里孩數上書求貢癸丑德王見潏之國濟南山都掌蠻叛李瑾討平之三月敵入大同王越等禦走之仍開浙江銀礦夏四月立十二軍法毛里孩入貢建州董山入貢五月荊門州訓導高瑤請復郟王帝號命有司議聞六月始收江南船稅秋七月敵入榆林湯楮勦戰死之留建州董山於廣甯遣其家眷往諭部落歸順八月英宗實錄成董山抗拒囚之命進討之九月賑江西湖廣給賜建庶人後冬十月趙輔討董山誅之進兵大捷十一月盜竊太宗神御冠器獲之左庶子黎澗奏高瑤妄言宜罪之不聽翰林編修章懋黃仲昭等諫上元張燈事上怒杖闕下調降之

四年戊子春正月朝鮮會討董山賞之趙輔進爲侯二月壬辰朔日有食之免高郵糧六萬有奇遣內官錢能往雲南鎮守改于謙子冕爲兵部員外郎三月禁皇親乞土田著爲令建州復請入貢夏四月封西僧爲大寶法王固原滿四反據石城指揮申澄死之諸將會兵進討敗績逮甯遠伯任瓚等下詔獄五月仍復附學生例六月免江南諸項糧二百八十八萬有奇日本來貢甲寅慈懿皇太后崩從大學士彭時議時合葬裕陵鑿徐州洪中流惡石禁內官家中鹽八月命都督劉玉等率兵討滿四敝山都功進李瑾爲侯餘陞賞有差上大行慈懿皇太后諡曰孝莊皇后九月西天佛子劄實巴乞河間靜海地爲寺田宛平民爲佃戶許之尋追還冬十月初定考官以身言書判例伏羌伯毛玉討滿四戰敗死都御史項忠力

拒乃定。十一月，項忠、馬文升等進攻滿四擒之，檻送京師伏誅。敵入延綏，擊敗之。十二月丁亥朔，日有食之。石城賊復立火敬爲主，項忠等搜殲之。

五年己丑，春正月，大覲考察，任壽等謫戍。二月，立西安衛。敵入延綏，官軍禦之遁去，增固原衛軍。衍聖公弘緒犯令，黜爲民。修南承天門。閏二月、三月，策士賜張昇等進士及第出身有差，選張璠等十八人爲庶吉士。敍平滿四功陞賚有差，真人張元吉凶暴淫橫，逮下獄。廷臣擬毀府第，絕廕封，禁符籙。從之。旣而不果。夏四月辛巳，皇子生。五月，鹽盜錢厚等作亂，稱江海上公，都督董寬討擒之。六月癸亥朔，日有食之。命都御史張鑿撫甯夏降敵。秋七月，流賊李鬍子作亂，馬文升勦平之。八月，復視午朝，開靈州屯田。皇親周彧奪民田，刑部郎中彭韶、御史李琮執法還民，上怒，下獄。冬十月，敵犯榆林及延綏甯固。

六年庚寅，春正月，大同巡撫分兵延綏禦敵，敗之。二月，搜收淨身人，命侍郎等官曾輩等往無巡撫處撫安地方。秋成卽還。三月，免湖廣糧二十八萬，山東三十九萬有奇，蘇松六十二萬有奇，發內庫銀四十萬犒軍，以撫甯侯朱永爲平虜將軍，備延綏邊，編修陳晉奏乞降佛子法王真人位號，不許。夏四月，免漂水等處糧三萬有奇。五月，毛里孩犯邊，獲之伏誅。陝西北敵近邊，命嚴備之，命各撫按考察屬官。王越卻敵，大造西山佛閣。孔弘泰襲封衍聖公。六月戊申朔，日有食之，罷會官保舉。秋七月己卯，皇第三子生於西宮，是爲孝宗皇帝。修孝慈高皇后惠監生妻室紅板倉，賑京城及順天饑民。延綏及河套報捷。八月，免臨洮糧八萬有奇，下寬恤詔。阿羅出犯榆林，平胡將軍朱永等禦卻之，命御史專用科目，不拘內外考選。套

虜阿羅赤求入貢。九月，秀王之國河南，命雲南土官襲職歸黔公，發倉五十萬平糶。時京師米價騰湧，冬十月，宥張元吉極刑，戍肅州，免保定糧三萬有奇，河南糧及子粒三十八萬有奇，命監生歸籍聽取用，荆襄餘孽復反，命王越等搜河套，尋召還，免山東糧二十八萬有奇，十一月，都御史彭誼戰女直勝之，命官十四人大賑畿南，虜孛羅入河套，與阿羅赤合，十二月，乜烈忽寇陝西，擊卻之，再發京糧二十萬平糶。七年辛卯，春正月，命京官五品以上及科道官各舉所知一人，罷民運，行長運法，項忠勦襄鄧賊平，尋召還。二月，復蘇杭鈔關，久旱，詔求直言。三月，冊封琉球，始稅江南竹木，還套虜來使，遼東戰勝之，勒荆襄流民還故土。夏四月，築榆林邊牆，再發米十萬，石京師平糶。六月，處州礦賊作亂，秋七月，賑浙江山東盜入漢中。閏九月，設榆林衛，立學校，成邊牆千二百里。冬十月，浚通惠河故道，築滹沱白溝隄。十一月甲子，立皇次子祐極爲皇太子，頒詔大赦，尋薨，諡曰悼恭。星變，廷臣言君臣情隔不通，請召對，傳御殿，中官給廷臣曰：初見勿多言致厭，再見言未晚也。及見上，大學士彭時、商輅等止言京官薪俸不可減，上允行。羣呼萬歲而退，中官乃笑曰：見無奇謀，止呼萬歲，乃名爲萬歲閣老。十二月，荆襄賊首李鬍子等伏誅，星變，避殿撤樂，禁官司科罰。

八年壬辰，春正月，大覲，考察募民納馬，廣西獠作亂，二月，忻王見治薨。三月，策士賜吳寬等及第，出身有差，西敵犯內地，官兵擊走之，允張元吉子玄慶襲真人。夏四月，增築邊堡，錄囚，賑卹京畿，河南、山東，命趙輔、王越防河套。五月，韓雍討忻城寨賊破之。六月，增設慶陽衛，冊封占城國王，傳陞寫隆善寺碑人爲尙

寶少卿給事中王詔諫不聽。命工匠張定柱等三十人爲文思院副使。敵犯臨鞏。馬文升擊敗之。生擒平章鐵烈孫等。秋七月。九月乙卯。秀王見澍薨。冬十月。十二月。賑京城饑民。免眞定糧三萬有奇。

九年癸巳。春正月。免武昌糧三十一萬有奇。二月。禁鎮守中官理民詞。免山西糧五十八萬有奇。三月。減雲南銀課十之五。免淮安糧二十四萬。免湖廣糧六十萬有奇。塞外野燒。延近山陵。發軍萬人撲之。夏四月辛酉朔。日有食之。三衛結女直犯遼東。擊卻之。壬午。上大閱武於西苑。山東大荒。免今年稅糧。撥鹽引百萬。臨清倉粟十萬賑之。六月。徙延綏鎮於榆林。遣官如山東祭告海嶽。雨。免陝西夏稅及逋糧。秋七月。命都督李文等規復哈密城。免彰衛糧十六萬有奇。復設江南等處勸農官。八月。王越捕寇於河套。敵遁去。免南畿糧九萬有奇。九月。免平陽府夏麥二十五萬有奇。敵自花馬池復入陝西。高陽伯李文等率降敵討鎖檀阿力王。不克而還。冬十月。敵犯廣甯。上再閱武於西苑。十二月。暫停徵馬。免畿內糧十一萬。山西糧二十六萬有奇。重修靈谷寺。

十年甲午。春正月。命王越總督各路兵馬駐固原。命哈密酋脫脫不花居嘉峪城。二月。發糧銀二十萬給邊。三月。免湖廣逋糧。崇王見澤之國汝甯。申巡方考復例。免武昌田租五十二萬餘。夏四月。免太原平陽糧八十二萬有奇。免江北子粒一十七萬有奇。免西安夏稅四十五萬有奇。六月。命各王府給工價從宜。修繕勿役民。閏六月。秋七月。旱。免南昌等府糧八十六萬有奇。止遼府殉葬。八月。敵入宣府。命都督趙勝。佩印督兵勦之。修南海子。九月癸卯朔。日有食之。免南畿糧五十九萬有奇。命勛臣新襲及駙馬年少者。

入國子監讀書習禮。冬十月發太倉銀三十一萬給邊需。停遼東黑山取金。命妖人李孜省爲太常寺丞。十一月免河南等府稅麥三十四萬有奇。敵犯平涼鞏昌。十二月許大臣子弟入學。遣使如占城。不果入。而還。備錄妖書名目。榜示天下以禁絕之。罷湖廣寶慶淘金。

十一年乙未。春正月大覲考察。追取逃軍匠一萬六千餘名。命增孔廟樂舞。許品官立家廟。二月閉宜陽銀洞。三月策士賜謝遷等及第出身有差。夏四月命御史十一人分道清軍。禁遷安銀礦。甲午重建宮門。五月免武昌鎮江漳州糧二十八萬有奇。丁卯召皇子於西宮。賜諱祐檉。令文武羣臣見於文華門。免江北糧十三萬有奇。冊皇子母紀氏爲淑妃。徙居永壽宮。六月淑妃紀氏薨。諡曰恭恪莊僖。秋七月朵顏三衛請開馬市。不許。浚杭州西湖。修南京太廟。八月浚通惠河。北使入貢。閉秦州銀礦。九月丁未朔日有食之。浚大小清河。廢襄垣王仕壘爲庶人。冬十月命查西洋水程。將差寶船。兵部寢之。十一月癸丑立皇子爲皇太子。詔赦天下。十二月詔曰。曩者朕叔郕王踐祚。戡亂保邦。亦既有年。屬彌留之際。姦臣貪功生事。妄行讒搆。請去帝號。先帝尋知誣枉。深懷悔恨。以次抵姦於法。不幸上賓。未及舉正。朕嗣承大業。一紀於茲。敦念親親。用成先志。可追尊諡曰恭仁康定景皇帝。福建疫。遣使祭其山川。

十二年丙申。春正月。初設鄖陽府及湖廣行都司。並加思蘭寇宣府。二月乙亥朔。日有食之。三月禮部奏。近來每年度僧萬餘。乞加限制。從之。靖州苗亂。李震破之。夏四月。罷常德採辦金課。五月。宣大各衛設儒學。六月。趙王見潯有罪。革冠帶。秋七月。皇第四子祐杭生。是爲興獻皇帝。祭酒周洪謨請加孔子諡號爲

帝報寢。妖人李子龍伏誅。八月。監生袁慶祥極言買寶石之弊。不省。擅阿力入貢。增孔子樂八佾。籩豆十二。九月辛丑。初設西廠。命太監汪直率官旗詞事。冬十月。傳陞官二十餘人。冊萬氏爲皇貴妃。邵氏爲宸妃。都御史朱英招撫兩廣。獠獞爲編戶。十一月。禁東北邊市軍器。

十三年丁酉。春正月。以水災免浙江稅糧四十一萬有奇。二月。築遼東牆堡。西廠羅中書董嶼等於獄。籍沒都指揮楊暕家。閏二月。禁傳報旨意。以災傷免山東糧四十一萬有奇。水災免河南糧三十九萬有奇。三月。以廷臣切諫。罷西廠。日本入貢。夏四月。復設西廠。以災異遣官祭岳瀆。刑部郎中武清廣西還。禮部郎中樂章等安南還。西廠擅繫京官下獄。不以聞。命太監錢億等械故少師楊榮家口百餘人下獄。大學士商輅等劾汪直不報。五月。水災免鳳陽子粒十九萬有奇。詔罷西廠。召太監懷恩數汪直罪。遣韋瑛戍宣府。六月庚戌。以御史戴縉。王億奏復設西廠。秋七月辛未。詔翰林官內閣自考察。餘從吏部會考。水旱免江南糧四十二萬有奇。旱災免福建糧十五萬。八月。西廠收繫工部尙書張文質。上聞釋之。九月甲申。吉王見浚之國長沙。冬十月。南欽天監修大統麻。及回回麻城。復立哈密衛於苦峪口。十一月。許朝鮮市弓。嚴文武官乘肩輿。水災免江南糧五十萬有奇。定京官十年一考察。著爲令。

十四年戊戌。春正月。大覲考察。立不及調用法。己卯。襄王瞻墀薨。定軍官五年一考。著爲令。二月戊申。皇太子出閣講學。始設東宮侍衛官校。三月甲子。皇太子冠策士。賜曾彥等進士及第出身有差。選梁儲等二十八人爲庶吉士。以災免河南及杭州糧九十萬有奇。禁外夷進貢挾私貨。命馬文升招撫建州。閉烏

撒銀洞。復開遼東馬市。免江南收買花木。夏四月。山東、遼東、淮揚各災傷。免糧一百六十萬有奇。冊封琉球。定州縣官不用監生。著爲令。免遼東貢藥材。二年五月。廣西流賊大掠。六月。遣太監汪直處置遼東邊務。英公懋請停圓通寺工役軍。不允。秋七月。復趙王見濬爵。賑北直隸。山東饑。宣府兵禦敵敗績。八月。汪直至遼東。招撫未竟而還。封占城國王。免湖廣糧十六萬有奇。西廠執應天巡撫牟俸。侍讀學士江朝宗等於獄。九月。選舉將材。敵牧近邊。備之。冬十月。工部尙書王復奏法王國師勿給墳塔費。罷內官侯伯烙馬。歸其事於太僕。水災免北畿糧二十萬有奇。雲南勦叛夷平之。

十五年己亥。春正月。水災免山東、湖廣糧一百四十萬有奇。二月。復遣太監劉儗鎮守江西。水災免遼東折租銀十三萬六千有奇。三月。遼東總兵韓斌、都御史陳鉞變建州。逮之。鉞誣文升。尋西廠執文升下獄。戍四川。夏四月。傳陞李孜省爲太常寺少卿。江北水災。免麥米四十萬有奇。敵入大同。禦卻之。五月。以不言牟俸事。謫牟俸等。廷杖科道官五十六人。免湖廣、河南田租七十六萬有奇。六月。雲南討蠻賊破之。秋七月。早。免山西糧二十九萬有奇。三衛入貢。八月。溫處礦盜平。命汪直行邊。廣東妖人劉佛翹伏誅。九月。貴州苗叛。冬十月。遣汪直率兵伐建州。閏十月。革華陽王申錡爵。十一月。汪直等掩殺建州入貢人六十餘名。復出塞焚其廬舍而還。十二月。建州以復讐爲名。深入遼東大掠。陳鉞不報。錄遼東功加朱永保國公。餘陞賞有差。水旱免江西、四川、湖廣田租合二百一十八萬有奇。

十六年庚子。春正月。命汪直監督團營。復命汪直督兵如延綏禦敵。禁雲南官民通夷。免鳳陽稅糧三十

八萬有奇。劉吉起復。兵科給事中孫博切言東西廠旗校中傷大臣。非禮。乞禁之。不聽。二月。詔天下於孔廟前立下馬牌。千戶張定進寶石。命掌鎮撫司理刑。遣孫博詣汪直軍紀功。大同禦敵卻之。滿都魯數寇榆林。以旱免湖廣糧七十五萬有奇。大修闕里。減畿內一切征徭賑之。汪直、王越等襲寇於威甯海子。破之。尋封王越威甯伯。三月。發倉米三十萬石平糶。夏四月。御史強珍劾汪直、陳鉞隱匿失機等罪。不聽。五月。兩廣擒田州苗黃明會。逐知府岑溥。平其寨。奏捷。水災免河南糧三十五萬有奇。敵犯薊州。秋七月。汪直誣強珍乖方。下詔獄。謫戍。文武官俸折布。裁山西行太僕寺少卿。八月。女直入遼東。免補解順天富戶。九月。僧繼曉乞乘傳詣湖廣九峯寺許之。逮巡撫陝西都御史秦紘下獄。籍其家僅敝衣數事。上歎其廉。賜鈔釋之。調河南。冬十月。南京科道共劾陳鉞姦邪。不報。十一月。察東宮管莊內官有占民者悉歸之。番入洮州。申禁僧田。敵入大同。汪直、朱永、王越督兵禦之。罷市舶。

十七年辛丑。春正月。免浙西糧。及淮鳳稅。太原田租。合九十五萬有奇。修南苑殿宇。二月。王越等師出甯夏禦敵。卻之。汪直奏改陳鉞爲兵部尙書。三月。策士賜王華等進士。及第出身有差。戊寅。徽王見沛之國。鈞州。山東及淮徐水。免秋糧四十五萬有奇。傳陸戴縉爲右都御史。西域貢獅子。遣中官迎之。都督王信撫定湖廣諸蠻。夏四月。敕太監懷恩會官錄囚。設山西平虜衛。五月。江南海子劉通反。尋捕擒之。敵犯宣府。守將吳儼被圍。命汪直等赴援。未至。儼弃師出。六月。築遼東鳳凰等城堡。秋七月。賑陝西。遣官冊封暹羅國王。八月。傳陸李孜省爲右通政。建州求貢。不許。九月。定權量。諭吏部調御史于大節爲推官。賜海外

諸國敕。冬十月。湖廣災。免田租十之六。水災免河南及大名。蘇州糧四十二萬有奇。十一月。御史許進白湖廣總兵李震冤獄忤直。以疏字訛杖之。尋震百口得釋。取戶部銀三十萬入內。十二月。命汪直。王越提督各路兵馬。開府大同。

十八年壬寅。春正月。賜太監梁芳淮鹽五萬引。二月。何喬新敗敵於灰溝。陞賞報捷人汪銍爲都督。三月。賑蘇松。夏四月。琉球王請陪臣子弟入監讀書。從之。復罷西廠。免山西糧五十四萬有奇。五月己巳朔。日有食之。六月。閉建昌銀礦。秋七月。劉吉起復。水災免蘇州。濟南。湖廣麥粟布糧合一百八十二萬有奇。免陝西糧十之八。哈密乞藥物。與之。許珠池內官兼捕盜。免鳳陽等府糧九十萬有奇。遣內官杜福等如常州等處求書畫。八月。遣官徧查災傷賑之。免浙江。陝西。河南糧一百五十萬有奇。閏八月。廣東賊入江西。大掠。冬十月。取太倉銀四十萬入內。十一月。禁各王府不得與親屬爲婚。傳陞劉峯爲禮部尙書。李孜省分獻郊祀。十二月。賜顏氏廟戶。免東昌及湖廣水災糧三十萬。甘肅破敵。

十九年癸卯。春正月。延綏破敵。定貪酷官不得援赦例。三月。免掌欽天監太常寺卿童軒官。己酉。月食。旣四川巡撫孫仁討大掌壩番寇平之。夏四月。免河南及邵武糧八十萬有奇。五月。減浙江銀課三分之一。汪直請達官禦敵。不許。六月。調太監汪直於南京御馬監。遣官浚漕。丹藥道士高宗諒遣歸。秋七月。敵犯大同。許甯敗績。敵尋去。朱永復至大同。八月。敵入渾源。遂至鴈門。宣府巡撫秦紘擊之破走。山西巡撫邊鏞復邀勝之。遂遁。御史徐鏞等劾汪直。上命廷臣會議。因降直奉御。王越除名。寘安陸。戴縉革職。張頤落

職起馬文升、強珍等爲原官。九月，陝西巡撫鄭時上言切直，上怒，謫爲貴州參政。授廣東聽選舉人陳獻章爲檢討，予告。傳陞李裕有爲右都御史、掌院事。妖人王臣使蘇，常索書畫、花木，暴橫南畿。巡撫王恕疏劾，逮伏誅。僧繼曉請旌其母孝行，許之。母故娼也。冬十月，召朱永還京。十二月，廷臣奏諫傳陞之弊，命降李孜省等官，黜回籍，尋留之。

二十年甲辰，春正月，大覲，考察。杖東廠太監尙銘，降充南京淨軍。浚薊州東西河道，免延安及大同糧三十萬。二月，廢陽曲王鍾鏞爲庶人。南御史孫需等奏繼曉罪狀，逮繫廷杖，尋釋之。二月，亦思馬因寇大同，命戶部尙書余子俊等禦之。三月，策士賜李旻等進士及第，出身有差。大同兵破敵，免淮安糧十七萬有奇。夏四月，修天壽山陵及居庸隘口，以地震損壞故。革孟津王見濂爵。五月，大賑陝西，大同失機，逮巡撫郭鏜等下獄。六月，江以北大旱，遣官祀嶽瀆，冊封滿刺加國王。水災，免延安等處糧六十萬有奇。秋七月，命大臣分道賑江北，畿南諸省大饑，冊封占城。九月乙酉朔，日有食之。敵復入河套。冬十月，刑部員外林俊劾梁芳繼曉，上怒，廷杖之。免太原糧四十八萬有奇。罷雲南銀坑。日本來貢，再發京庫銀十萬。河南米五萬賑陝西。敵犯宣大，命定西侯蔣琬爲平朔將軍，率列侯出師禦之。遁去。十一月，免山東、河南稅糧三十八萬有奇。南戶部主事張倫請運漕糧二十萬，湖河賑陝西。從之。十二月，度僧道七萬人。濟山陝荒，封罕慎爲忠順王。入哈密。繼曉乞養母，并求空名度牒五百道，許之。內官傳進吏部尙書尹旻爲太子太傅。起丁憂中書杜昌。

二十一年乙巳春正月天變詔求直言廷臣各上封事李孜省等降秩有差繼曉黜回傳陞官二千餘人分別去留庚寅赦天下遣官賑山陝河南敵入延綏卻之二月放免傳奉官五百餘人德王請業南旺湖不許時言者益多上怒書言者六十人姓名於屏三月北虜小王子入寇邊將敗績命定西侯蔣琬爲總兵官率兵禦之上查內藏十窖俱罄上怒責內官梁芳韋興曰此祖宗積累未嘗用景泰頗取用英宗在南內聞之歎曰累世之積其盡乎復位視之缺一角因節它費補之今俱罄竭皆爾二人爲之興懼語塞芳對曰臣爲陛下造齊天之福因指顯靈宮之類上不懌曰後世必有與汝計者蓋指東宮也芳因惶恐時上愛興王或勸芳曰不如勸上易太子是昭德無子而有子興王無天下而有天下豈特免禍以言於昭德昭德感之因勸上易儲上曰此在司禮遂間召懷恩露其意恩免冠叩頭曰奴死不敢奉命甯陛下殺恩無使天下之人殺恩也伏哭不起上怒詔往鳳陽守陵次及覃昌昌曰以恩力猶不能回天況昌乎於是上謀之閣臣皆默不對事遂寢會泰山震欽天監奏曰東宮得喜乃解上曰彼應天象乎奏曰陛下上帝東宮上帝子上頷之遂爲東宮選婚册妃取回南京內官匠作夏四月申溺女之禁免山東江北糧五十七萬有奇閏四月給京師流民米五月南贛盜起命僉都閔珪撫治之六月開武官納粟許世襲例秋七月八月己卯朔日有食之九月災傷免陝西河南山東山西四川糧合二百五十五萬有奇安寧降夷於廣甯復諸傳奉官萬安劉吉嗾大學士劉翊致仕冬十月北敵入宣府西敵入臨洮

二十二年丙午春正月次第免河南南畿廣東江西湖廣田租合三百五十四萬有奇二月丁酉朔日有

食之。罕東劫貢使。諭還所掠物。貴州苗亂。三月。敵入開原。夏四月。停給僧道度牒。廢充城王膺錕爲庶人。秋七月。廣西盜亂。尋平復。建大永昌寺。冬十月。命僧道官考試入選。始命錦衣官守登聞鼓。罷南兵部尙書王恕。免吏部尙書尹旻。其子侍講龍爲民。

二十三年丁未。春正月。大覲考察。辛亥。妃萬氏卒。監生虎臣諫萬歲山勿架棚遠眺。上奇之。時祭酒費閻鎖繫臣。上宣臣至左順門曰。爾言是。棕棚卽毀矣。命吏部與七品正官。閻慚甚。命京營指揮顏玉率兵如莊浪遏敵。破之。二月丙子。皇太子納妃張氏。次第免陝西湖廣江西浙江糧二百六十三萬有奇。傳陞李致省爲禮部左侍郎。三月。策士賜費宏等進士及第出身有差。選程楷等三十人爲庶吉士。滿刺加國入貢。夏四月丙戌。上皇太后周氏徽號爲聖慈仁厚皇太后。詔赦加恩。廣東兵破賊捷。至六月。命四歲童葉珠入翰林。秋七月戊申。冊封皇子祐杭爲興王。八月庚辰。上不豫。命百官朝皇太子於文華殿。戊子。上大漸。召皇太子受遺詔。己丑。上崩於乾清宮。壽四十一。九月壬寅。上號諡曰繼天凝道誠仁明敬崇文肅武宏德至孝純皇帝。廟號憲宗。冬十月壬午。葬茂陵。

史官贊曰。從來災異警告。至帝而極。而卒以垂拱獲治平。蓋帝值重熙之運。承祖宗撻伐之餘。雖有小醜。旋就恬夷。彭商贊襄於內。韓馬宣力於外。卽雜以劉萬汪。李巧媚蠱惑。終無所損焉。縱水旱頻仍。蠲賑多至萬萬。是以上下熙熙。號稱極盛。至其尊禮孝莊。追崇景帝。保汪后。卹于謙。於愛憎恩怨間。毫無芥蒂。尤人所難。雖然。使帝能抑內寵。卻寶玩。斥遠宵小。以崇儉德而奮剛斷。誠一守成令主也。噫。

明書卷十一

本紀九

孝宗敬皇帝本紀

帝諱祐樞。憲宗第三子。母御妻紀氏。先是己丑九月。憲宗幸昭德宮。幸上母。既娠。萬貴妃知而恚之。百方苦楚。胎不墮。憲宗令託病出居安樂堂。以痞報。而諭中官善事之。於成化六年七月己卯。生上於西宮。時有風雷之異。容貌奇聳。儼如龍形。太監張敏以粉餌哺之。西內廢后吳氏抱保惟謹。不使萬貴妃知。萬妃生長子薨。而皇太子祐極復薨。成化十一年。上生已六歲。太皇太后育之宮中。五月。憲宗宣示羣臣命名。冊紀氏爲貴妃。六月。萬妃觴貴妃。暴薨。贈諡恭恪莊僖淑妃。上哀慕過甚。然天性沈默。深自斂晦。十一月。立爲皇太子。既出閣。聰明穎露。所受書未嘗錯誤。憲宗製文華大訓。時進講。必撤案降坐立聽。已乃復坐。書法飛動。不習而能。聖性堅定。學問淵博。中外喁喁頌德焉。成化二十三年八月戊子。憲宗崩。九月六日壬寅。上卽皇帝位。頒詔大赦。改明年爲弘治元年。是日。上大行皇帝號諡。妖人李孜省伏誅。僧繼曉發原籍爲民。方士趙玉芝等遣戍。內官梁芳南京閒住。法王國師領占竹等奪印敕儀仗。安奠四川光相寺。賜賚宗室及文武羣臣軍民人等。命查革異端冗官。進獻傳奉官。安南入貢。乙卯。尊皇祖母周氏爲聖慈仁壽。

太皇太后。皇后王氏爲皇太后。諡上母貴妃紀氏爲孝穆慈惠恭恪莊儔崇天承聖皇太后。冊妃張氏爲皇后。召懷恩於鳳陽。掌司禮。尋卒。冬十月。盡罷傳陞官。盡革僧道官。乙亥。徽號禮成。詔赦。封占城國王。古來爲王。敕安南還其侵地。朝鮮入賀。賜各邊官軍銀人各二兩。十一月。罷萬安。革內外倉場太監。召王恕爲吏部尙書。馬文升爲左都御史。十二月辛未。建祧廟。奉安懿祖。升祔憲宗。別祀孝穆太后。曰奉慈殿。御史曹璘請削萬妃諡。號遷葬。上曰。止勿復言。壬午。葬茂陵。孝穆皇太后祔葬。免湖廣屯租十之六。內侍郭鑰請選妃嬪。謝遷以上在諒陰止之。上是遷弗選。

弘治元年戊申。春正月。詔天下舉異才。敵入密雲古北口。戰敗之。閏正月。詔修憲宗實錄。詔錄用諸註誤官。遣官如廣西訪孝穆太后親屬。取回各處抽分御史。賜太監懷恩祭葬。二月。上耕籍田。辛丑。命興王等五王出閣讀書。令問刑官讀律。遣官祭諸陵。及闕里。歷代帝王陵。嶽瀆山川。敵犯廣甯。擊敗之。三月。幸學用太牢。尤起謫籍遺逸。丙子。開經筵。賜齊庶人增宅及婚嫁費。仍令傳寫朝報。勒太監錢能於外。不許入京。考察京官。夏四月。山西流賊亂。討平之。五月。革南京武職冗員。小王子稱大元大可汗求貢。命嚴備之。卹高牆庶人。六月癸巳朔。日有食之。右庶子張昇劾劉吉。給事中胡重。御史魏璋附吉。反劾昇。不聽。許小王子五百人入貢。甯陽侯陳輔有罪。斥爲民。逮妖僧繼曉。伏誅。始命大臣督團營。以馬文升兼之。秋七月。日講畢。上曰。先生每辛苦。因賜程敏政等緋衣金帶。先朝留中疏悉付史館。禁雲南太監進貢。命詳讞疑獄。八月。停各處採辦貢獻。詔考正孔廟從祀名位。給守祖陵庶人銀幣。敵數犯宣府。甘肅。獨石等處。守將

禦走之。滅雲南銀課。九月北虜請報使不許。請陞職許之。孝穆太后親屬紀貴紀旺至京。賜田宅。人口冬十月。詔毀菴寺。汰尼解軍門給配繅士。命考察王府官。不爲例。旱免河南夏稅。代王獻海青。諭卻之。賑湖廣。四川十一月。修南京國學。命彭韶爲都御史。清理兩浙鹽法。詔有勢豪阻撓鹽法者罪之。十二月。授沙狐狸金吾千戶。曾於虜中事英宗有功。上憫而官之。

二年己酉。春正月。禁中官及藩戚乞封武職。二月。大賑。四川免秋糧三分之二。免湖廣糧九十萬有奇。劉吉誣降庶吉士鄒智石。城吏目夏四月。王恕年七十五。免其午朝及風雨朝。減浙江銀課。六月。敵犯關外。徽王請祀中岳。諭止之。盡革錦衣傳奉官。賑京畿。秋七月。以災傷。詔求直言。土魯番阿黑麻襲殺忠順王罕慎。遣使入貢。求爲哈密王。下敕切責之。八月。免南畿衛屯之半。敵犯赤城。九月。清查畿內莊田。有司請畿內閒田給民耕。從之。寬三科舉人不許會試例。冬十月。罷浦城銀冶。廣西兵破流賊。平之。山西妖賊王良等伏誅。命科道二人如廣西訪孝穆太后的派。十一月。徽王乞陞鈞州爲府。不許。發銀五萬兩。米十五萬石。賑順天饑。阿黑麻王由海道進。狻猊卻之。十二月甲申朔。日有食之。贈于謙太傅。柱國。謚肅愍。立祠。選民兵。

三年庚戌。春正月。大覲考察。兩廣都御史秦紘征瀧水野鴨山賊。平之。三法司勘太監蔣琮。降黜琮如故。再發倉米三十萬石平糶畿南。二月。晉王乞建世子府。不許。疏直沽海口。水災免直隸河南糧七十八萬有奇。三月。策士賜錢福等進士及第。出身有差。開成都灌縣堰。中官請鷹房牧地千頃。不許。夏四月。阿黑

麻王入貢。求歸城池金印贖使人。五月。岑欽攻田州府。逐岑溥。秦紘敗走之。復溥。六月。伯顏猛可貢馬。發洪武。永樂。宣德錢。與古錢兼行。修南京城及門。秋七月。紀貴。紀旺詐冒事發。遣戍。廢武邑。王聰沐爲庶人。八月。增南奉先殿日供。立孝穆皇后廟於廣西。準袁彬世襲。閏九月。土魯番貢使由海道至京。罪經過官司。冬十月。給事中韓鼎請選妃嬪。廣儲嗣。許之。十一月。浙江礦賊亂。平之。癸卯。瓦剌太師入貢。停工作及撤江西燒造內官。十二月。詔大臣條奏軍民利病。時政得失。戴珊勦蜀盜野王剛平之。

四年辛亥。春正月。申禁胡語胡服。小王子來貢。營建太廟後殿。劉吉。喉御史鄒魯劾刑部尙書何喬新下詔獄。釋。尋致仕去。嚴自宮禁。三月。廣東黎賊反。討敗之。夏四月。番賊入河州。廣東德慶賊亂。貴州黑苗反。守將次第討平之。秋七月。北虜遣人貢馬。停織造。土魯番入貢。獻還哈密金印。八月己未。封諸弟祐楛壽王。祐棹汝王。祐樞涇王。祐樞榮王。祐楷申王。丁卯。憲宗實錄成。九月。皇長子厚照生。是爲武宗皇帝。頒詔天下。冬十月。改封興王於安陸州。漳平盜入安溪。官軍擊敗之。敵犯甘肅。丁卯。修太廟及神宮監。蜀應天糧。十二月。貴州苗七富稼作亂。革甯化王鍾炳等爵。癸亥。冊興王妃蔣氏。

五年壬子。春正月。遼府鎮國將軍思鑑及南渭王長子膺鑼罪廢。俱徙鳳陽。停陝西綏叛之半。二月。敵入宣。大甘肅禦之。三月。戊寅。立皇長子厚照爲皇太子。詔赦兩廣會兵討古田獐賊。禁永平銀礦。錄常遇春孫復。李文忠孫濬。鄧愈孫炳。湯和孫紹宗。俱爲南錦衣指揮使。劉基裔孫瑜爲處州衛指揮使。夏四月。江南浙西大水。賑之。五月。太廟祧殿成。奉安懿祖神主。六月。廢荆王。見瀟爲庶人。徙寘武昌。免畿馬十之三。

命鎮遠侯劉溥等討貴州蠻。秋七月，命工部侍郎陳政塞張秋決。河八月，劉吉致仕去。太后父張巒卒，追贈昌國公。命其子鶴齡爲壽甯侯。賑兩浙。九月，回回自海道入貢，卻之。始以銀中鹽。冬十一月，停納鹽事例。封溫處銀礦，免應天歲辦三之二。

六年癸丑，春正月，大覲考察，免山東鹽課六萬八千引。二月，給事中吳世忠乞褻遜國諸臣，下禮部議格不行。募民納米於貴州，敵入龍門，邊將擊敗之。三月，策士賜毛澄等進士及第，出身有差。夏四月，選顧清等二十人爲庶吉士。甯王宸濠襲封，請復前革祿米，從之。五月，敵入甯夏，邊將敗績，停撫鎮以下俸。閏五月，水災，免應天等府糧一百八十萬有奇。禁勦戚奏乞田土。六月，兩廣賊平。湯陰王見準敗倫伏誅。秋七月，庶人見滿不軌事發，勒令自盡。子女安寘武昌。復戶部各鈔關。冬十月，止番僧領占竹入京。十一月，詔舉山林才德，命衢州孔子裔孫彥繩爲五經博士。

七年甲寅，春正月，興王之國安陸。二月，加解州鹽四十萬引。一年，貴州蠻平，命平江伯陳銳等治張秋決。河口三月己卯朔，日有食之。夏四月，塞張秋隄成。濬南京天潮二河，發回夷使安置兩廣。詔閉嘉峪關絕西域貢。六月，土魯番來貢，還所掠哈密夷人。秋七月，敵犯昌平。九月，發內官蔣琮充孝陵軍。冬十月，西域貢獅子，卻之。以京軍修大內宮殿。十二月，敵屢入犯。

八年乙卯，春正月，募甘肅土兵禦敵。都御史許進上議哈密方略，詔可之。三月乙酉朔，日有食之。革鄭府涇陽王見溢爵。夏四月，封朝鮮世子李懜爲國王。始設南贛巡撫，命撰三清樂章。大學士徐溥執不可，上

嘉納止之。六月。上杭盜復起。北虜別部款肅州塞內附。許之。野先克力來歸。厚賞勞之。秋七月。敵數入宣府。八月。命都御史金澤捕荊襄盜。九月。北虜擁衆入河套住牧。松潘蠻寇四川。冬十月。修舉社學。取前賓相光寺番僧入居慈恩寺。給事中柴昇疏諫。上讀疏曰。左右果欺朕也。卽敕止之。免雲南積逋礦銀。陝西妖僧爲逆。都御史張敷華擒之。都御史許進。總兵劉甯等帥師出嘉峪。入哈密。土魯番遁去。班師陞賞有差。十二月。詔停一切工役。流賊掠江西。修潮河川關。敵入古北口。禦走之。

九年丙辰。春正月。大覲考察。戶部主事胡瓘疏諫災變屢告。由宦官李廣。楊鵬引用劉良輔等。以左道惑聖心。齋醮糜費致。上由是漸疏廣等。諭十六阿歹與興菴先孛刺結親和好。賞以幣布。科道拾遺。二月。增文廟樂舞。如天子之制。修孟廟。癸酉。皇第二子薨。追封蔚王。三月。策士賜朱希周等進士及第。出身有差。選顧潛等二十人爲庶吉士。廣賊劫信宜。官軍失利。乙亥。皇太子冠。閏三月。御文華殿。日講官王華以上方信任李廣。諷上講唐李輔國與張后表裏用事事。上聽之喜。命反復詳說。頷之曰。古昔然矣。卽撤御食。賜華。日本入貢。土魯番復據哈密。夏四月。琉球入貢。妖僧張金峯等伏誅。武岡知州劉遜遵制減岷府祿米。王許奏。上怒。逮繫詔獄。科道等官申救。俱下獄。大學士徐溥等力救。上命并釋之。北虜入貢。五月。上命依劉遜削岷府祿。六月。尹直表賀萬壽。并上皇太子承華箴。上鄙之曰。此獻諛希恩也。卻之。秋七月。敵屢入大同。宣府。冬十月。停取寶坻銀魚。刑部吏請革東廠。發爲民。大學士徐溥疏請嚴早朝之節。復奏事之規。勵講學之功。優接下之禮。遠邪佞之人。斥誣妄之說。上嘉納之。

十年丁巳春正月奉御張瑄獻閒田爲東宮莊田下詔獄罪之北虜火篩犯花馬池官軍禦於神木敗績
二月上遊後苑畢御講筵學士王鏊進文王不敢盤于遊田上悟退責李廣等曰今日講官所指殆爲若
輩好爲之自是不復遊獵考察京官惟學士免考三月始纂修大明會典上御文華殿召輔臣議政事每
奏疏反復詳審乃行自天順至此三十年始舉其天質明睿如此許進數鎮守太監劉瑯罪瑯懼遁去夏
四月災異詔求直言敵掩潮河川指揮劉欽等二十七員戰死大同禦敵敗績命侍郎劉大夏等如宣大
整飭兵糧禦敵選團營兵預征秋七月八月上御平臺召輔臣議政事敵警禁訛言冬十月起左都王越
總甘涼經略邊務十一月土魯番歸哈密敕印求入貢切責之十二月虜寇赤斤百戶劉達擊破之復萬
貴妃家官王越率兵搗賀蘭山後敵破之巡撫甘肅都御史周季麟戰口勝之多斬獲兩廣兵征麓川猺
撞平之

十一年春正月清宣大屯田二月小王子入貢三月皇太子出閣講學夏四月五月甘肅擊敵敗之六月
敵犯莊浪秋七月兩廣都御史鄧廷讚會兵討宿盜李景光等殲之八月王越請復封陝巴王哈密從之
九月壽王之國冬十月甲申清甯宮災時李廣以左道貴幸進言建毓秀亭於萬歲山亭成幼公主病飲
廣符水殤清甯隨燬太皇太后怒數廣罪上亦悟切責之廣遂自酖死詔籍沒其家十一月詔寬恤天下
閏十一月戊戌朔日有食之詔停一切齋醮十二月停四川採大木冊封安南敵犯遼東都指揮劉剛戰
死

十二年己未春正月大覲考察敵入遼東官軍連擊敗之二月定武職旁支襲官遞降法忠順王陝巴復入哈密三月下給事華臬學士程敏政以洩題及舉人唐寅徐經於詔獄甲戌策士賜倫文敘等進士及第出身有差敵犯宣府都御史馬中錫敗之丙子衡王之國夏四月古田獠獠作亂下督撫勦之命禮部議復建文帝號五月水免江北子粒二十七萬有奇六月歸土魯番使人甲辰闕里先師廟災遣大臣祭告敵入甘州秋七月築山海抵居庸邊牆延千里繕城堡二百七十荆襄妖賊何淮僭稱王兵備李善擒平之八月雍王之國降石城王宸浮爲庶人甲申重建清甯宮成冬十月採珠於廉州十一月乙丑太皇太后還居清甯宮上高王宸濠嗣封甯王十二月詔大能仁寺國師那卜堅參等入宮設壇慶讚廷臣切諫上曰卿言是顧永樂閒亦有之既而遂止不行

十三年庚申春正月火篩大寇宣大逼居庸京師戒嚴飭平江伯陳銳爲平虜將軍侍郎許進督軍務率師禦之分遣大臣守潮河川天壽山居庸紫荆倒馬諸關隘二月命詳定問刑條例夏四月上御平臺召廷臣親簡京營將帥敵入大同者八日五月甲寅朔日有食之丙申復召廷臣諭兵部推舉各官卽宣手敕六月戊戌許進陳銳無功下詔切責以保國公朱暉佩印召陳銳等還秋七月陝西巡撫熊翀得玉璽來獻禮部辨其僞上命置之庫己巳虜去召諸將士還九月福建賊入廣東討平之冬十月革鳳陽鈔關十一月敵入馬蘭谷十二月敵再犯大同尋引去火篩入河套

十四年辛酉春正月馬文昇因地震切諫上報以忠愛遂撤織弼使臣及停傳奉禁奏討中外稱慶二月

敵犯石匣城。禦走之。命征虜將軍保國公朱暉都御史史琳等西禦敵。至河套。敵遯。獲其畜物而還。三月。上躬閱列侯騎射。賞罰有差。仍賜武經命誦習。停江南導河夫役。夏四月。五月。賑山西荒。延綏兵破敵。賞之。六月。普安州女賊米魯反。會兵討之。敗績。海西酋尙古求入貢。秋七月。敵屢入甘肅。命南戶部尙書王軾率兵討米魯。閏七月。保定進白鴉。斥遣之。甯夏禦敵。卻之。虜火篩寇固原。恭順侯吳瑾無功。罷之。以武安侯鄭英率兵禦之。八月。賑兩直隸。山東西。河南災傷。米魯等聽撫。革景泰以來內外鎮守。協守。分守等官。九月。丙子朔。日有食之。停武當山齋醮掛像。甲午。汝王之國。史琳無功。起秦紘代之。冬十月。米魯復叛。岐王祐棄薨。十二月。賑兗州徐邳等處。欽天監改造渾儀。

十五年壬戌。春正月。大覲。考察江西盜起。都御史林俊勦散之。傳陞盧龍衛指揮分守通州。三月。湖廣兵破賊李再萬平之。丁亥。策士賜康海等進士及第。出身有差。改胡煜等二十人爲庶吉士。命九門內官止督譏察。不可干預國課。夏四月。賑京師。壬子。涇王之國。敵潛入密雲。禦之去。五月。庚午朔。日有食之。唐王彌錦請諡號美惡兼用。從之。秋七月。王軾破斬米魯。餘黨悉平。九月。減光祿寺日供。及鳥獸料食。敵入遼東。擊敗之。冬十月。水災。免江南糧三十萬有奇。

十六年癸亥。春正月。孟養思陸歸我侵地入貢。二月。上郊祀。賜閣臣蟒衣。鑄弘治通寶錢。詔取牡丹。廷臣諫。卽命止之。夏四月。六月。減蘇杭織造三分之一。秋七月。命守備內官不許多占軍伍。廣東討黎賊符南蛇。斬之。停太倉織苧布。申王祐楷薨。進建昌伯張延齡爲侯。冬十月。停刻佛經道書。貴州阿方車等叛。平。

之閉沂州銀礦。

十七年甲子春正月盜發慶恭王墓。詔封江陵世子彥汰嗣岷王。通渭王旭繼嗣韓王。都梁王祐櫛嗣荆王。停福建取禽鳥。二月廣東盜古三仔等伏誅。三月壬戌太皇太后周氏崩。諡曰孝肅貞順康懿光烈輔天成聖睿皇后。立廟別祀。夏四月己酉孝肅皇太后祔葬裕陵。閏四月小王子入貢。辛酉重修曲阜孔廟。成命大學士李東陽致祭。五月減光祿寺果品。取回蘇松織造內官。六月回賊流劫江以北地方。大同兵禦敵。指揮鄭瑀力戰死之。敵遁去。敵入延綏。總兵白玉擊卻之。秋七月上召廷臣至暖閣。議以京軍出援邊。兵部尙書劉大夏陳利害。遂止不遣。敵尋引去。八月考察京官。學士免考。停止降虜世官入京操練。冬十月上屢召廷臣至暖閣議機密。初設武科。定三年一次。十一月敵犯莊浪。環慶姦人劉山伏誅。敵圍靈州。邊將戰卻之。命看詳試錄乖違者罪之。

十八年乙丑春正月大覲考察。岑濬據思恩討誅之。命調宣大延綏兵援花馬池。上召劉大夏戴珊曰。當朝覲。大官閉門謝客。若卿二人雖日延客。孰敢以賄通。手白金二錠賜。止勿謝。恐他人知。未免懷慚耳。二月詔曰。朕圖新政。理樂聞讜言。除祖宗成憲不可紛更。其事關軍民利病。切於治體。但有益於致治者。無論大小臣工。咸直言勿隱。二月禁密雲銀冶。上召劉大夏面諭之曰。事有可否。欲召卿議。又以事非兵部。今後有當行止者。具密揭以聞。大夏對曰。不敢。上曰。何也。對曰。先朝李孜省可爲鑑戒。上曰。卿論大政。豈被營私者比。大夏曰。揭行亦前代斜封之類。願陛下遠師聖帝。近法祖宗。凡事商之內閣。府部。如揭帖久。

則上下俱有弊。上曰：善。戶部主事李夢陽指斥時政，下獄。既而釋之，問廷臣曰：外議以爲何如？廷臣對曰：皇上釋李夢陽，中外頌聖德。上曰：夢陽奏有張氏二字，左右謂其語涉中宮，朕不得已下之獄。及詔獄讞，詞上。左右奏曰：此狂妄人，宜付錦衣杖而釋之。朕悟此輩欲重撲夢陽致死，以洩中宮之忿。朕所以卽釋之，不令法司擬罪也。廷臣曰：陛下此事真堯舜之仁。三月，策士賜顧鼎臣等進士及第，出身有差，改崔銑等三十人爲庶吉士。夏四月，上召大臣至便殿，凡弭治盜賊，會推官員，鹽法、錢法、刑獄、徭役，一咨詢處置。日昃乃罷。如是者久之。每召對天顏和霽，問答詳審，藹然家人父子。中外稱慶焉。甲申，上不豫。五月庚寅，上大漸。召劉健、李東陽、謝遷入乾清宮，命近御榻。上曰：朕承祖宗大統，在位十八年，三十六歲乃得此疾，殆不能興。與先生每相見少矣。健等曰：陛下萬壽無疆，偶而違和，漸須調攝，安得遂爲此言。上又曰：朕爲祖宗守法度，不敢怠荒。凡天下事，先生每可謂盡瘁。又曰：朕蒙皇考厚恩，選張后生東宮，今十五歲，尙未選婚。社稷事重，可命禮部速行。然東宮頗聰明，但年幼好逸樂。先生每勤勸之讀書講學，輔之作一好人。皆頓首曰：臣等敢不盡力。辛卯午刻，旋風大起，雲籠宮殿。空中若有人騎龍上昇者，都人皆驚視。俄傳上崩。六月，上號諡曰達天明道誠純中正聖文神武至仁大德敬皇帝。廟號孝宗。冬十月庚午，葬泰陵，掩壙時五色雲見於陵上。先是遺詔下，中外震悼，哭臨之日，臣民號慟不能興拜。梓宮所過，哭聲震野。其得人心之深如此。

史官贊曰：古稱周成殷甲，至今想慕風徽。以帝方之，厥庶幾哉。方其凝命璇宮，卽能崇御訓。隆師傅，謙恭

仁孝天下傳聞其盛節及御鴻寶紹休烈祖克親政務以弘邗隆勤緝熙之學優晉接之禮每決大疑斷大事必霽色怡顏與大臣從容慎審而後沛然見諸施行其上古都俞吁咈之風乎至於廣闢言路獎廉懲貪經筵虛受每稱先生而不名君臣一德大復國初之舊萬尹一時罷去雖耐彈如劉縣花亦不能安其身且誅姦除佞使天下曉然知邪道之不可亂政怠荒是戒勤勵爲圖美政善言史不絕紀至於保念昭德友愛諸王而於祔廟一事尤能抑至情遵禮制古云惟聖盡倫惟王盡制惟孝子爲能享親惟天子建中和之極稱之以孝殆無愧焉終帝之世內外安甯幾至刑措朝多耆俊之臣民懷樂利之澤洋洋蔚蔚有豐芑棫樸之盛矣升遐之日萬方哀痛如喪考妣豈其偶耶說者猶曰外戚太厚賜予太廣此亦自兩宮起見耳若孝宗者吾殆無間然

明書卷十二

本紀十

武宗毅皇帝本紀

帝諱厚照。孝宗嫡長子。母張皇后。弘治四年九月二十四日。上生於宮中。支干類太祖。二歲冊爲皇太子。少顧視雄矯。及出閣。聰慧喜負。睪然有勝心。頗好騎射。孝宗每曰。東宮惠聰明。柰逸樂何。常隨事訓迪。上往往撫對稱旨。十八年五月辛卯。孝宗崩。明日頒遺詔。以前孝宗素所擬十五事採入。頗多興革。壬寅。上卽皇帝位。詔赦天下。改明年爲正德元年。壬子。嚴宮殿門禁。募宣府土兵禦敵。六月。命清查圍營兵。發延綏兵策應宣府。敵犯蔚州。命守各關隘。庚申。上大行皇帝號諡。賚各藩及文武軍民。占城入貢。求封敵犯。至大同。邊將失利。命朱暉、史琳等率兵禦勝卻之。秋七月。以太監張瑜、太醫劉泰等用藥不效。下獄。八月甲寅。尊祖母王太后爲慈聖康壽太皇太后。尊母后張氏爲皇太后。錄康茂才裔孫永、吳復裔孫江俱爲千戶。復用遺詔。裁去監鎗內官二十四人。頒外夷詔。有司擬遣山川祭官。詔止。就近望祭。福建賊劉宗保等平。差太監王讚等往南京浙江織造。九月。賑延安。詔給餘鹽於房親張鶴齡。冬十月。建立皇莊七處於畿輔。以內官守之。朝鮮入賀。己未。祧僖祖廟。敵退。撤還官軍。庚午。葬泰陵。十一月。更易各處鎮守等內官。

十二月。敕修孝宗實錄。冊封安南國王。立仁壽宮等處皇莊。

正德元年丙寅。春正月。上耕籍田。二月。幸太學。王鏊以上好遊逸。請復仁宗弘文館故事。不報。分祀諸陵。歷代帝王陵。及闕里山川。閣臣屢疏求罷。不允。命操練東廳新選官軍。命內官分坐京營。夏四月。內旨授大同隨征官數百人。內旨收選淨身男子一千二百名入內。五月。上始微行。減蘇松織造之半。戒言官無得挾私舉劾。差內官查勘皇莊。六月。府部等衙門官張懋等疏諫馳獵。不報。大學士劉健等疏諫視朝太遲。遊幸太廣。寶玩非以崇儉。彈獵非以養仁。狗馬野物。不可育於朝廷。弓矢兵戰。不可施於宮禁。願親正人。聞正言不報。秋七月。八月戊午。冊立皇后夏氏及德妃沈氏等。九月。御經筵。罷內官抽運木植。五官監候楊源諫天變修德。杖之。謫死河南。冬十月。內旨差官往江西造磁器。閣部廷臣會劾內八黨。上命劉瑾掌司禮監兼團營。邱聚谷大用提督東西廠。內旨勒大學士劉健謝遷致仕。以太監王岳等交通外臣。下獄。尋殺之。李東陽乞致仕。溫旨答不允。分遣內官守備南京。及管各鎮兵馬。內旨晉焦芳。王鏊入閣辦事。十一月。南京科道官合詞諫。上黜權閹。留保輔。上怒。并逮下詔獄。內旨勒戶部尚書韓文。閑住。罷李夢陽官。許鳳陽守備太監倪文兼轄江北軍民。十二月。兵部主事王守仁申救南京科道官。杖之。謫爲貴州龍場驛丞。景皇帝后汪氏薨。祔葬金山。悉除曲阜糧稅。始以中書李憲改給事中。

二年丁卯。春正月乙亥朔。日有食之。內旨逮枷尙寶寺卿崔璿。按察司副使姚祥。主事張偉。以大臣救釋。遣戍。劉瑾傳旨諭吏兵二部。凡進退文武官。會瑾議定。乃聞。閏正月。劉瑾傳旨諭兩京都察院。凡有奏章。

先揭瑾乃聞內旨勒禮部尙書張昇致仕命捕土豹於甘肅內旨降李夢陽爲經歷二月奪故大永平長公主府第爲外廠補各關隘守備內官允鎮國將軍誠激襲封秦王修南海子行殿裁冗官一百餘員兩廣兵剿賀縣賊破之邱聚陷御史王時中枷杖遣戍命琉球歲一入貢陞僧官設署大功德寺仍於大內建寺召入誦經三月辛未敕文武羣臣列大學士劉健等五十六人爲姦黨勝於朝堂夏四月命鎮守內官許理軍民詞訟給專敕敵入大同擊卻之詔預造鰲山燈架五月給事中陶諧疏諫戒逸遊以保治安逮杖爲民內旨復寧王護衛屯田六月會選將材廣東賊入江西大掠秋七月勒南吏部尙書王華致仕命追奪弘治元年以後文官封蔭雲南兵擒賊張華平之八月黃河清慶雲見翼軫辛巳興王世子厚燧生是爲世宗皇帝改劉瑾姪壻監生曹謚爲千戶詔造豹房公廨堂廡丁亥內旨召楊廷和入辦內閣事九月抑度孺童章朝宣叛官軍討平之革參贊機務文官冬十月賜皇親沈傅吳讓莊田六千頃內旨御史許讚改編修錄孔子裔二人主尼山洙泗二書院取進戶部銀五十萬十一月詔許王府無嗣皆擇代襲逮各邊巡撫及管糧郎中俱下獄旣而內旨命重徵糧價商賈死者甚衆內旨裁天下按察官十二月雲南夷阿本叛討平之

三年戊辰春正月大覲考察復逮李夢陽下詔獄尋內旨釋之命朝覲布政各進銀二萬兩二月停巡撫官符驗三月策士賜呂柟等進士及第出身有差改翰林編修檢討顧清等爲部屬官內旨授焦芳子黃中官賜劉瑾莊田於正陽門外折毀民房三千九百餘間發起民墳二千七百餘塚夏四月開武職納銀

補官例。始開武舉。宴於中府。哈密入貢。封劉瑾等八內官。父皆爲都督。五月。賑南畿。籍沒故尙書秦紘及強珍家。以競渡造龍舟。籍沒江西民吳登顯等家。以匿名帖子命朝官三百餘人。跪午門外。至未。暴烈日。中死者十餘人。餘俱下詔獄。逮致仕尙書韓文下獄。罰米三千石。罄其家。命訪良馬。秋七月。諭慶成宴始用雜戲。戊午。榮王之國常德。內旨枷都御史劉孟於大明門。八月。逮前尙書劉大夏等。發邊衛永成。宣大破敵。立內廠。以劉瑾領之。內旨進劉宇。吏部尙書。九月。命有司不得奏災異。都察院錄囚。有劉瑾傳奉字。命十三道跪內廠。數其罪。御史俯受之。冬十月。四川盜藍廷瑞等作亂。以林俊率兵討之。追奪馬文升。劉大夏等官誥。逮強珍子姪坐斬。賑江北。十一月。建玄真觀於朝陽門外。李東陽爲碑文。頌瑾功。十二月。罷各邊中鹽納內庫。

四年己巳。春正月。廣東清洞盜平。憲宗廢后吳氏薨。劉瑾欲焚之。廷臣力爭。命葬之。二月。內旨命吏部不時考察京官。不必照六年例。勒前大學士劉健。謝遷爲民。著令餘姚勿得授京職。三月。敵入宣大。甲辰。御經筵。大學士王鏊致仕。廣東賊林貴等作亂。命都御史劉洪討之。江西賊起大掠。夏四月。命毀大明會典。其預纂修官降革有差。內旨李東陽如故。五月。孝宗實錄成。改翰林侍讀徐穆等爲南部屬。以劉宇爲大學士。入內閣。六月。樂平盜起。秋七月。日本入貢。八月。內旨加都督神英。涇陽伯。九月。畿內盜起。增鑄靖南將軍印。閏九月。敵入延綏。總督才寬禦勝之。冬十月。奪平江伯陳熊爵。籍沒。發全家。戍南海衛。敵入寧夏。才寬禦之。命列侯俱赴內教場演試。四川大盜劉烈僭號稱王。大掠至陝西。十一月。以義子朱鐸等爲錦

衣官十二月。四川賊藍廷瑞僭號順天王。大掠至湖廣。陝西兵禦敵破之。追奪劉健謝邊劉大夏韓文等原賜衣帶銀誥。連及者六百七十五人。

五年庚午。春正月。裁江西解額五十名。命刑部尙書洪鍾討四川盜。二月。日本復入貢。加楊廷和吏部尙書。進武英殿。召曹元入閣辦事。領吏部尙書。三月。降黜各道御史。改各部主事爲之。災傷免各處逋稅五百萬有奇。瑾矯詔出內官張永於南京。永覺。訴上前。與瑾相爭。毆諸內璫。解之而罷。上大笑。沔陽水寇邱仁等作亂。官軍討之。敗績。洪鍾以計擒之。尋平。夏四月。慶府安化王寘鐸反。殺撫鎮官。自署官封拜。鑄符印。發檄以討劉瑾爲名。關中大震。總兵曹雄等率兵禦之不克。命指揮孫隆盡燬各壩積聚。未幾。遊擊將軍仇鉞執寘鐸并其黨周昂等。遂平。頒詔天下。賑河南。敵犯遼東。禦卻之。上命涇陽伯神英及內監張永等率兵討寘鐸。以旣平還師。五月。湖廣討賊官兵敗績。六月。惠潮賊平。秋七月。四川巡撫林俊討藍廷瑞。敗之。擒廖惠等。廷瑞奔紅口。會鄆本。恕。俊復追擊。大敗之。賊棄輜重走。湖廣兵討賊破之。八月。張永還京。獻俘。寘鐸等伏誅。劉瑾謀不軌。伏誅。籍沒得家財鉅萬。及龍袍金印龍盃甲諸物。中外快之。罷劉宇。曹元。宇子仁爲民。焦芳及子黃中。以附瑾劾并爲民。論平寘鐸功。封仇鉞咸寧伯。封內官張永。魏彬。馬永成。谷大用。義子朱德。俱伯爵。冊封占城國王。召諸翰林官於南京。革寧王護衛。奪神英伯爵。復陳熊伯爵。九月。詔復科道官三十一人。議復貶謫官尙書李傑等五十三員。冬十月。總兵馬安敗賊於景州。桃源賊汪澄三等反。給撫復叛。陷安仁。滅九門錢鈔。張綵死於獄。石文義等伏法。十一月。命工部刊張永屬李東陽等

爲窮魚苦菜詩傳之。霸州賊劉六等反，獲劉七宥，尋叛去，免蘇松常三府稅。十二月，盜陷江津，殺僉事吳景等，轉入呂梁，殺主事伍全。甲申，上太皇太后王氏爲慈聖康壽太皇太后，皇太后張氏爲慈聖皇太后。蜀賑浙西，都御史林俊圍燒逆賊曹甫等於伏子岸，殲之。平。命太監喬忠如南京織造，許帶鹽引，關隘不許詰問。

六年辛未，春正月，大覲考察，盜陷營山，播州蠻寇亂，命高崇熙爲副都討之。山東盜起，命都指揮李瑾討之。二月，停四川採辦，添修豹房寺觀。巨盜劉六等起畿輔，連陷州縣，命惠安伯張偉等率兵征之。三月，築浙東捍海隄。山東賊陷樂安濱州高苑諸州縣，河南賊流劫延津封邱諸州縣。巨賊劉寵等流劫山東，殺京營指揮六人。乙丑，策士賜楊慎等及第出身有差，選許成名等三十三人爲庶吉士。江西賊破新喻諸縣，敵入河套，擊卻之。賊犯闕里，禮拜而去。轉掠眞定大名，山東兵討賊勝之。河南兵敗賊於應山。夏四月，命太監張永會官釋囚。江西盜大起，贛賊陷新淦，執參政趙士賢。靖安賊據趙王嶺，華林賊陷瑞州州。撫州東鄉饒州姚源盜皆大掠，命都御史陳金率兵討之。貴州苗叛。五月，四川賊陷茂州，殺其官，遂陷劍州諸處。賜京民八十以上粟帛。賊劉六等自山東掠河南，轉掠湖廣，入江西南直隸。所在閉城自守，商旅斷絕。命太監韋興偕林俊專討藍廷瑞。六月，命洪鍾林俊藍璋合討四川賊。日本遣甯波叛民宋素卿來貢。敵犯延綏，敗去。山西盜李華起，合劉六與賊楊虎陷汜水諸處。陷棗強，知縣段豸死之。四川賊入貢川，自山西陷武安，燬臨洺，抄故城，復入文安。命都督張俊率京兵討之。藍廷瑞奔漢中，聽撫。劉賊自涪化陷卽

墨武城濟陽而南。秋七月。免河南稅糧。江西盜攻臨江府。官兵敗績。八月。四川賊入貴州。陷婺川諸州縣。左都馬中錫招劉六等就撫。廷臣執不可。賊叛去。永順土舍彭世麟擒藍廷瑞等。官軍剿餘黨破之。內旨召張偉等還。命陸完統其軍。賊陷固安大城。靜海青縣。天津兵禦勝之。還秦紘籍沒家物。下馬中錫等於獄。九月。流賊劉六等擁衆向都城。京師戒嚴。陸完合諸將大敗賊於固安。山東賊張興等起。主事張嘉謨征敗於高麗店。殲平之。官軍屢勝劉六等。至保定戰。敗績。命太監谷大用協同陸完討賊。廷臣屢求建儲。不報。四川盜復起。冬十月。劉六等東掠破日照諸縣。廣福賊入江西連破州郡。劉六等焚運舟千二百餘艘。敵犯山丹。敗去。十一月。賊攻徐州。轉掠南陽。至江北。免山東粟豆二十四萬。敵犯宣府。趙瑛戰死。復寇涼州。邊將擊敗之。命改東關倉爲義子朱德私居。十二月。陸完督諸將破賊於濰縣。賊分六股。遂由濰縣突廣平入河南。至虹縣。陸完追破之。

七年壬申。春正月。敵犯甘肅。擊破之。賊犯霸州。京師復戒嚴。命伏羌伯毛銳駐河南。谷大用陸完駐畿南。分諸將隸之。四川兵破賊於川南。毛銳遇賊於眞定。收績撤還。南昌知府李承助破華林賊。二月。賊各陷利津萊州。梁山睢甯蕭碭諸處。河南兵擊賊破之。都督馮禎戰死。江西廣西雲南各破賊捷聞。夏四月。賊復掠畿內。發倉糧二十萬石賑畿南山東。五月。陸完討賊勝之。劉六等奔登萊。諸將邀破之。南追至淮。賊遁去。劉賊自遂平趨朱皋。土兵擊敗之。盜殺湖廣都御史馬炳然。湖廣兵破賊。劉六溺死。閏五月。四川及大帽山賊方四張旺等伏誅。賊掠黃陂。據羅田。河南賊平。敵入嘉峪。擊破之。六月。劉七自黃州劫掠至九

江入鎮江。秋七月。川賊曹甫餘黨降。江西副使周憲討華林賊。戰死之。免谷大用西廠辦事。八月。劉七等犯南京。陸完促之掠淮安。自通州復遡九江。又轉南京。三往反。至狼山。舟畢集。遇颶風。舟覆。賊盡死。九月。論平賊功。封谷大寬等爲伯。進仇鉞爲威甯侯。陸完及內閣加秩封磨。一時冒功授都督指揮千百戶者千餘人。賜義子百二十七人國姓。冬十月。內旨調邊兵入衛。廷臣極言不可。上不聽。遂召大同遊擊江彬等領兵入衛。十一月。江西羣盜平。冊封占城。十二月。詔建鎮國寺於大內。西域四川賊廖麻子等大掠。命都御史彭澤合兵討之。山西妖人李五以幻術作亂。尋敗平之。

八年癸酉。春正月。詔建延壽寺於西內。殿內爲夷鬼淫褻之狀。鉅細千餘。金函藏所謂佛骨之類。不下千百片。江西賊王浩八等復大掠。命都御史俞諫等討之。尋平。以降虜充御馬監勇士。二月。川賊降。三月。敵入大同。邊將禦之敗績。夏四月。甯王宸濠修陽春書院。僭號離宮。詔開皇店。五月。敵入山西。邊將敗績。六月。科道劾江彬妄殺良民。不報。秋七月。詔立皇莊五處。滌陽王奉祀郭琥革職。九月。賜江彬國姓。冬十月。以義子錢甯掌錦衣衛。東鄉桃源賊復叛掠。尋平之。十一月。追贈劉基及諡。

九年甲戌。春正月。大覲考察。會舉將材。慶成宴始。至設燭。上張花燈於乾清宮。不戒火。都御史彭澤討重慶賊平之。二月。上御豹房。四川羣盜平。上偕錢甯等微行黃花鎮等處。歸入教坊司。廷臣請上擇宗室親賢入京。不聽。江西反賊平。三月。策士賜唐皋等進士及第。出身有差。再復甯藩護衛屯田。夏四月。甯王宸濠自稱國主。護衛爲侍衛。令旨爲聖旨。五月。江西賊復起。敵入宣大。諭吏部。凡言事遷謫官。永不起用。秋。

七月商洛盜起。敵犯宣府。命張永等率兵禦之。八月辛卯朔日有食之。敵犯白洋口。敕邊將固守。九月編修王思疏諫。佞倖蠱惑上心。上怒。杖門下。謫嶺南驛丞。冬十月。敕建乾清坤甯二宮。十一月。梁穀妄陷魯府。歸善王當沅降爲庶人。王觸牆薨。廣西盜起。殺指揮李鎮等。選團營勇士四衛兵萬二千人入西內操練。以江彬提調之。十二月。分諸太監爲守備。及督鹽採珠市舶等務。

十年乙亥。春正月。敵入潮河川。二月。命都御史陳天祥修各關隘。三月。上出自西安門。經宿而還。廷臣諫不報。夏四月。考察京官。閏四月。兀良哈寇馬蘭路。參將陳乾戰死。五月。都御史王倬等擊敵於馬蘭。敗之。六月。命兵部侍郎陳玉等率兵討兀良哈。秋七月。四川苗作亂。擒斬之。八月。都御史邊憲敗敵於花馬池。敵大入陝西。九月。命都督張洪率兵西出禦敵。冬十月。江西按察副使胡世甯奏甯王不法事。下敕責之。甯王宸濠復奏副使胡世甯離間誹謗。內旨逮下獄。幾瘐死。尋解。十一月。經始乾清宮。十二月癸丑朔日。有食之。敵入雲州。復入渾源州。以養晝眉烏食謫光祿寺少卿楊瑋於外。

十一年丙子。春正月。上御豹房。引邊將江彬許泰劉暉及錢甯皆名義子。同狎近。號外四家。二月。以王守仁巡撫南贛等處。並設東西兩官廳。以內豎及外四家統。上自統閹人有力者爲黃兵。上與諸近倖生格。虎豹爲所傷。不視朝久之。三月。武官馬昂進有娠妹。上幸之。官都督。賜第太平門。無少長。賜蟒玉。科道呂經等諫不聽。上幸其第。酒酣召其家婦。忤旨。上怒。疏其女弟。勒昂以病歸。夏四月。敵入宣府。總督侍郎丁鳳禦卻之。秋七月。以貨郎趙璜俞琳晉憲職。分修畿輔武備。八月。四川峽蠻作亂。招撫不聽。進兵討之。次

年五月卒。衆復入宣府。命內官張忠等督兵禦之。復以成公輔等節制。九月。官軍禦敵於龍門。敗績。上猶岐山。各盜起。尋俱平之。敵退。官軍還京。冬十月。副使陳九疇敗土魯番於肅州。

十二年丁丑。春正月。大覲考察。上獵於南苑。二月。上幸功德寺。三月。策士賜舒芬等進士。及第出身有差。

選汪佃等三十四人爲庶吉士。王守仁討信豐賊。敗之。夏四月。上微行至石經山。湯泉峪。蹕玉泉亭。十餘

日。乃還。命大臣賑畿內。土魯番陰使寫亦虎仙以祕術進。上納之。預義子列。甯府典寶閻順等告宸濠陰

謀。杖發孝陵。許湖廣太監杜甫經歷比較。雲南盜起。官兵敗績。始權進貢番舶。都御史王守仁率兵攻何

塘洞賊。平之。六月乙巳朔。日有食之。詔許秦藩封壤。廷臣以祖宗著令。不與藩封。力爭不聽。擒江西賊首

陳日能。平之。秋七月。上微服幸昌平。大學士梁儲等追至沙河。諫止。不聽。己酉。上欲出居庸。巡關御史張

欽諫阻閉關。上怒。還幸馬房。戊午。上夜御奉天殿視朝。賑湖廣。八月丙寅。上夜出德勝門。宿昌平。辛未。度

居庸。幸宣府。命谷大用守關。毋得縱人出追。九月甲戌。上在宣府。營鎮國公府第居之。壬辰。上駐陽和。始

稱總督軍務。威武大將軍。總兵行印。信鈞帖。丁酉。萬壽節。百官遙行賀禮。戊戌。上獵大同。遂幸陽和。是日

敵以數萬犯陽和。上命諸將擊之。敵引去。庚子。取戶部銀一百萬。解赴陽和。冬十月癸卯。上駐順聖川。丁

未。上親督列侯諸將禦敵於應州。敵遁。辛亥。敵復入犯。尋去。十一月癸酉。上駐大同。四川蠻平。命陝西織

造龍絨。戊寅。上還宣府。冬至節。上在宣府。盜焚故大學士費宏家。巡撫孫燧捕之。左溪賊平。十二月壬寅。

上在宣府。復開納銀事例。廷臣至居庸請駕不得度。乃還。閏十二月。上在宣府。戒諭京城守門內官毋放

廷臣出城封江彬爲平虜伯許泰爲安遠伯閏十二月立春上迎春於宣府備諸戲劇命大車載僧與婦女數千人鬻戲上視之大樂

十三年戊寅春正月丙午上還京郊祀畢復出關遊幸江西兵平涇頭賊及討九連山賊平之百官進遊幸還朝賀儀上賜以銀牌惟翰林官無賀儀不賜辛酉上復如宣府二月上在宣府己卯慈聖康壽太皇太后王氏崩越三日上於宣府發喪三月上還京師上太皇太后諡號孝貞純皇后都給事中石天柱刺血上疏諫不聽尋內旨調爲推官上遣中官如烏思藏迎活佛廷臣屢諫不聽夏四月上以大行太皇太后將祔葬親告六陵遂如黃花鎮等處遊獵賑淮徐饑五月己亥朔日有食之上次喜峯欲招三衛夷人納質宴勞御史何士元等力諫不報戊申上還京師六月教坊司奉鑾臧賢乞閑溫旨留用甲申葬太皇太后於茂陵秋七月錄應州功陸賞者九千五百餘員敵犯甯夏上復議北征廷臣諫不聽仍自稱威武大將軍太師鎮國公更名壽巡邊以江彬爲威武副將軍令內閣草敕廷臣奏爲邇者上時出巡邊久不親政天下人心無不危懼又復爲此萬一宗藩中或有援引祖訓指此爲名具本上請不知陛下之左右及臣等代言之臣將何自解上不省屢遣中官促之於是楊廷和稱疾上御左順門召梁儲草敕儲曰敕不敢草陛下爲君乃自卑而例於臣是以臣名君不可上怒手劍曰不草齒此劍儲免冠解衣伏地流涕曰臣逆命願就死敕不敢草良久上擲劍起更命廷和草之丙午上發京師敕楊廷和居守丁未出居庸命守關如前命鳳陽太監兼廬淮揚三府督捕上自宣府如大同八月上在大同敵入陝西九月上在大

同庚子。至偏頭關。自改稱鎮國公。賑南畿。冬十月戊辰。上渡黃河。己卯。駐榆林。十一月。上在榆林。十二月。上在榆林。復渡河。幸石州文水諸州縣。遂駐太原。召娼家劉良女幸之。四川熨蠻復叛。

十四年己卯。春正月戊辰。上發榆林。丙子。駐宣府。詔改郊期。二月乙丑。上發宣府。先是宣府建行宮。費不貲。實珍玩婦女於其中。上每謂曰。家裏欲居之。以從臣力諫。乃歸。壬申。還京。往返數千里。上卻輦。戎服佩弓矢乘馬。冒風雪。歷險阻。侍者病憊。上不以爲勞。內旨江彬提督團營。丁丑。郊。遂獵南海子。楊廷和上居守敕。上曰。朕不時巡狩。可勿還。命工部侍郎趙瓚採運大木。備營建。廷臣請建皇儲。以安宗社。不報。三月。詔曰。朕欲南巡。觀風天下。歷秦岱。經徐揚。抵金陵。覽興龍之勝。概下蘇杭。浮江漢。登武當。徧觀中土名勝繁麗。其以管家將指揮朱湧等四十七人爲錦衣官扈從。官舍一千人。充御馬監勇士。時甯藩反形已具。廷臣憂之。一時上疏諫者集闕下。陸完迎之。謂曰。上聞直諫。取引刀作劓狀。今日撒賴矣。以沮言者。一時言官多陸黨。遂沮。於是翰林修撰舒芬。吏部郎中夏良勝。禮部郎中姜龍。兵部郎中張鳳。刑部郎中陸鳳。兵部郎中黃鞏。次第疏諫。上大怒。逮夏良勝下詔獄。命舒芬等百二十人跪午門外五日。復各杖謫有差。一時死者陸震。余廷瓚。劉校。何遵。林公輔。劉珏。孟陽。李紹賢。劉平甫。李翰臣。詹軾。十有一人。是日京師陰霾晝晦。宮內池水溢四五尺。折橋下鐵柱。有金吾衛指揮張英。言車駕出必不利。乃肉袒露刃以死諫。遂不出。夏四月。修苑中宮殿。分義子提督東西二關。五月。命安撫各處流民。敕遣太監賴義等往戒諭宸濠。革其護衛。詔發兵索宸濠偵卒於臧賢家。不獲。六月丙子。甯王宸濠反。巡撫都御史孫燧按察司副使許

遽死之。遂攻陷九江。南康兵備曹雷知府陳霖等遁走。及諸衛州縣皆陷。己卯。興王祐杭薨。都御史王守仁往福建。聞變。易服走臨安。復走吉安。與知府伍文定等起兵。土魯番進貢。己丑。宸濠兵圍安慶。知府張文錦等守禦。卻之。秋七月。逮太監蕭敬及陸完。錢甯。臧賢。下詔獄。尋釋敬。籍錢甯。臧賢家。都御史王守仁知府伍文定討宸濠。遂入南昌。宸濠解安慶圍還救。至鄱陽湖。擊敗之。丁巳。復戰。遂擒之。奏上。未至京。八月。下詔南征。大學士梁儲。蔣冕從。命江彬。許泰。太監張忠。張永等先率六軍。由大江如江西。癸未。上發京師。以楊廷和居守。廷臣諫不聽。王守仁上疏止駕。不聽。丁亥。上次涿州。江西平表至。留中。九月。上次保定。禁民間畜豬。著爲令。戊戌。次臨清。復單舸疾歸。至張灣。載劉良女同往。崇明海盜起。冬十月壬午。發臨清。十一月甲辰。至淮安。屏從人步行。幸總兵顧仕隆宅。命拘錢甯於臨清。收其家屬。己未。大漁於寶應。汜光湖。十二月丙戌。上至南京。謁陵祭廟。太監張永還見上。言守仁之忠。并江彬等欲害之意。上不聽。命太監張忠等率兵擒宸濠餘黨。時已平。羅織死者不可勝計。詔純皇后大祥告。祔及觀察策士以次行。改王守仁巡撫江西。

十五年庚辰。春正月。上在南京。廣西兵討獠賊破之。二月。上在南京。三月癸丑朔。日有食之。楊廷和等奏言。純皇后大禮在邇。及朝覲官久集京師。殿試及期。自南巡。諸司奏章八月不下。乞回鑾。不報。三月。上在南京。夏四月。弛豬禁。賑淮揚饑。四川熨蠻平。五月。上在南京。辛牛首山信宿。軍中夜驚。乃還。始發。大察疏。六月。上在南京。一夜江彬索城門鑰。南兵部尙書喬宇守弗與。宇倡百官數請回鑾。不聽。秋七月。命南巡。

大學士梁儲等執奏跪宮以止之。八月。上在南京。閏八月。上在南京。九月上在南京。以大將軍鈞帖令王守仁重奏捷。守仁節略前奏入。江彬張忠等上之。遂受宸濠俘。發龍江漁。壬寅。如瓜州。入民家。夕宿望江樓。癸卯。自瓜州登金山。如鎮江。幸致仕大學士楊一清第。一清厚獻。上大悅。凡五幸焉。幸方故大學士靳貴第。撫柩嗟悼。命番僧誦經薦福。庚戌。發鎮江。癸丑。至揚州。庚申。至寶應。復漁汜光湖。如淮安。都御史叢蘭等進金牌花紅綵幃。上簪花騎入城。過山陽。至清江浦。幸太監張陽第。幸積水池。上自棹小舟。舟覆溺焉。左右掖出。遂還南京。冬十月。上自南京班師凱旋。十二月。駐通州。宸濠及逆黨皆伏誅。海外佛狼機始入貢。盡召內閣府部勳戚大臣赴行在。甲午。上還京師。

十六年辛巳。春正月。免徐州鳳陽糧稅。癸亥。上不豫。寢疾。豹房。廷臣請還宮。不聽。二月。陝西盜起。三月。癸丑朔。日有食之。乙丑。上大漸。惟太監陳敬蘇進在左右。上曰。朕疾殆不可爲矣。爾以朕意達皇太后。天下事重。其與內閣輔臣議處之。丙寅。上崩於豹房。壽三十一。內官奔告慈壽皇太后。乃移殯於大內。是日傳遺詔曰。以朕疾彌留。皇儲未建。朕皇考親弟興獻王長子厚熹。年已長成。賢明仁孝。倫序當立。遵奉祖訓。兄弟終及之文。即日遣官迎取來京。嗣皇帝。丁卯。遣定公光祚等詣安陸奉迎。大學士楊廷和毛紀等奉皇太后懿旨。逮江彬籍其家。尋伏誅。罷威武團練營官軍還各邊。革各處皇店并其官校。各邊鎮守太監留京者遣之。外夷進貢者厚賜令還國。豹房番僧及少林寺拳和尚教坊人等。遣去之。中外稱慶。五月上。號諡曰承天達道英肅睿哲昭德顯功宏文思孝毅皇帝。廟號武宗。九月庚午。葬康陵。

史官贊曰。無德易亡。辟則爲僂。斯言其不信哉。明當十葉際。十五載之濁亂。綠林橫噬於外。昏椽肆燄於內。而且金根野覲。鐵馬宮馳。然而鷓鴣厲風。鬼燐白晝。莫此時爲甚。觀帝身勞苦。乘馬佩弓矢。數千里不倦。蓋亦有爲之資也。慨然興鞭笞沙漠之志。乃郊圻之外。星棼旄頭。虎豹之關。塵駭馬跡。七萃之士。頻從三洲之詩已奏。雖沸羹爇鼎而旋見肅清。良由頤根久茂。是以弗至披撥也。嗚呼。不亡不僂。亦云幸矣。悲夫。

明書卷十三

本紀十一

世宗肅皇帝本紀

帝諱厚燠。憲宗孫。興王祐杭長子。憲宗生十子。長孝宗。次卽興王。次岐益等八王。弘治甲寅。興王之國安陸。妃蔣氏卽上生母。於正德丁卯八月十日。生上於興邸。生時黃河清。慶雲見軫翼。楚分。上穎敏岐嶷。王口授經書。靡不領略。其於孝經尤所究晰。進止凝重。虔秉禮度。正德十四年六月己卯。興王薨。諡曰獻。上受敕理國事。十六年三月丙寅。武宗崩。遺詔奉迎。戊寅。諸臣至安陸。進金符。上受符朝見羣臣。夏四月壬午。辭興獻王寢墓。癸未。發安陸。辭母妃。妃曰。吾兒此行荷重任。慎無輕言。上嗚咽曰。謹受教。遂行。丁亥。內閣楊廷和等具儀。由東安門入宿文華。如皇太子卽位禮。上覽。謂長史袁宗皋曰。遺詔以吾嗣皇帝位。非皇子也。廷和再請不允。遂請於皇太后。由大明門入謁。几筵朝太后。見皇后出。癸卯。卽皇帝位。頒詔。改明年爲嘉靖元年。大赦。時日正中。久旱霖雨。忽霽。萬象咸新。識者知爲更新之兆。甲辰。命大臣自陳無功。封拜之人。許自劾。引誘蠱惑姦黨。言官參奏。各衙門弊政。俱遵祖制改正。發宣府貯銀二十萬備賑。義子勒令復姓。丙午。諭閣臣迎母妃於興邸。以錢甯等家資濟邊代民賦。戊申。諭議興獻王主祀稱號。下王瓊等

於獄。奪謫有差。罷湖廣鎮監李鑑。復太監王岳。范亨官。恤其家。革鎮平伯陸永等爵。五月。錄忠諫諸臣。陸震等。死加贈。廢餘次第起用。凡內外內官。一遵舊制。奪其旗牌諸物。不許干預他事。閉大理府礦場。革先朝冒濫軍功官。遣使存問謝遷。命禮部及羣臣會議。與獻王典禮。詳具郊祀志中。己未。上。大行皇帝諡號。庚申。賚勳戚文武軍民。取回各非舊制內官。晉袁宗皋禮部尙書。文淵閣大學士。召還使朝鮮內官。丙寅。補策士。賜楊惟聰等進士及第。出身有差。改廖道南等二十四人爲庶吉士。壬申。錢甯伏誅。追奪內臣兄弟姪封廢。畿內皇莊。查給本主。六月。楊廷和請開經筵。四川松潘番亂。討平之。陝西賊田迪亂。討平之。戊子。江彬與其男及黨伏誅。乙未。縱內苑禽獸。釋宸濠甯彬等。註誤者二百餘人。丁酉。革冒濫錦衣官旗三萬餘人。裁南京內府各監局官員。革傳陞僧道教坊官三百餘員。盡削內外金剛老及把總大管家名色。禁珠池內官干民事。停織龍絨。秋七月。進士張璫上大禮疏。下有司申嚴奪情之禁。敵犯莊浪。禦卻之。禁東廠受民詞。再議興獻王稱號。濬王河。毀西市鎮國府及宣府離宮。寫亦虎仙伏誅。發倉米五十萬賑京師。及平糶。黜取佛太監。流刺麻國師二十七人於遠方。以儀真皇鹽爲官俸。甯津盜起。尋平。誅妖僧瑞竹。廢元明等宮寺。甲子。上手敕尊父爲興獻皇帝。母爲興獻皇后。祖母邵氏爲康壽太皇后。閣臣封還手敕。格之。八月。有司請考孝宗。母慈壽皇太后。不允。議出使外國。用文臣。禁各處內官抽分。詔諭朝鮮。免應天耗糧十三萬有奇。戊申。祧仁祖。九月。癸酉。上母妃次通州。以稱號未定。駐留。上聞之。號泣。奏皇太后。願避位奉母歸藩。內外及廷臣惶懼。必如手敕所稱。上乃悅。壬午。至京。由大明門入。上迎於闕內。山東盜平。江

西閩廣賊悉平。庚午葬武宗於茂陵。冬十月進士張璠進大禮或問。上嘉納之。十一月敕修武宗實錄。賑江西築遼東邊垣。敕江西功封王守仁新建伯。敵犯大同發正德留中疏八百六十本於史館。甲戌。乾清宮成。罷廣東貢香。十二月上手敕加興獻帝后尊號。皇字。廷臣力爭。上曰。卿等所言朕已悉知。但哀哀之情不能自己。罔極之恩。報亦無方。況朕奉昊天至情。不拘於史志。可勉從朕命。乙亥。慈壽皇太后誥諭選淑女大婚。

嘉靖元年壬午。春正月己未。郊。乾清宮後室災。楊廷和等因奏言。豈與獻帝后加稱。祖宗神靈或有未協者乎。上於是心動。乃稱孝宗爲皇考。慈壽皇太后爲聖母。興獻帝后爲本生父母。不加皇字。上初卽位。裁抑佞幸。諸途俱清。至是興邸舊人夤緣遷敍。至庖匠。厮役。寄祿。錦衣。階資。廕敍。幾於數百。而皇親邵喜等狎恃恩寵。請乞無厭。舊閣蕭敬等仍留。大內寺觀仍舊存葺。民產不盡歸還。左右近習。時有移易。於是給事中朱鳴陽。御史朱衣。主事高尚賢。鄭佐等。各疏諫。不報。馬平盜起。都御史張嶺討之。尋平。二月己丑。遣官分祭諸陵。闕里。歷代帝王陵寢。山川。敵犯遼東。考察京官。停各巡撫。入京議事例。河南盜流入陝西。參議陳鼎平之。三月。上諭內閣。興獻帝册文。朕宜稱孝子女。直貢豹。卻之。甲寅。幸太學。謁先師。乙卯。耕籍田。去雜戲。丁巳。詔曰。自古帝王以孝治天下。尊親之禮。其來遠矣。仰惟聖母慈壽皇太后。敬相皇考孝宗皇帝。訓育皇兄武宗皇帝。蔚有顯聞。皇嫂皇后。表正宮闈。母儀有年。重念祖母貴妃。事我憲祖。澤隆佑啓。本生父興獻王。聰明仁孝。本生母興獻王妃莊敬儉勤。誕育眇躬。丕承前烈。謹奉册寶。上聖母徽號曰昭聖。

慈壽皇太后。皇嫂曰莊肅皇后。又祇奉聖母懿旨。上聖祖母尊號曰壽安皇太后。本生父母曰興獻帝與國太后。大禮既舉。洪恩誕敷。布告天下。遣官詣安陸。上興獻帝尊號。侍郎賈詠題其主曰興獻帝神主。不稱考及叔。亦不敍子名。上念翊戴功。封楊廷和、蔣冕、毛紀。及指揮邵喜、蔣輪爲伯。駙馬都尉崔元爲侯。餘陞賞有差。山東礦寇王堂。流劫河南。久之乃平。夏四月。禁京城造酒。治馬昊等獻女之罪。立穎公友德等廟於雲南。額曰報功。行熱審法。恤囚著爲令。戊戌。御經筵。五月。罷封楊廷和、蔣冕、毛紀伯爵。餘加恩如故。錄功臣韓成裔、鳳翔。給冠帶祿米。六月。禁內官弟侄官錦衣。著爲令。秋七月。免江西逋租。詔國子監及提學官修補殘缺經史。免安陸田租十之三。敵入寧夏。指揮楊洪等戰死之。八月。封乳母宮媪劉氏等爲夫人。廷臣諫不聽。江西災。免漕米二十萬加賑。釋李夢陽於獄。九月辛未。冊立皇后陳氏。冬十月。冊恭妃文氏。順妃張氏。賑南直隸湖廣江西廣西。十一月。廣西賊黃鏐伏誅。庚申。壽安皇太后邵氏崩。敕覈畿內皇莊二十萬九百九十頃有奇。還民者二萬有奇。餘命曰官田。十二月。上壽安皇太后諡曰孝惠康肅溫仁懿順協天佑聖皇太后。山東賊流入河南。流劫大名。轉入南直隸。命隨處捕之。禁言官獨劾大臣。隨以諫官言除之。

二年癸未。春正月。大覲考察。給事中黃臣諫。內官蕭敬久竊重柄。復開傳乞之門。宜斥而禁之。不報。流賊至考城。官軍討之。敗績。指揮趙泰等戰死。敵入沙河。禦卻之。二月。山東賊自散。丙申。葬孝惠皇后於茂陵之右。修京師北城。三月。策士賜姚涑等進士及第。出身有差。酌卹高牆庶人。夏四月。詔興廟樂用八佾。命

兩京三品官各舉所知堪爲守令者。閏四月，廷臣諫齋醮，上曰：卿等亦忠愛言也。其停之。陝西盜楊錦等伏誅。五月，日本貢使大掠寧紹，敵犯密雲，復命興獻帝后加皇字。廷臣執不可。六月，災傷免江浙稅十之五。山西賊陷陵川，山東賊劫萊蕪，掠金鄉淄川諸縣，敵入甘肅，殺邊將。上賜都督陳萬言房基，工部尙書趙璜執不可。萬言銜之，訴於上。上怒，逮營繕郎中葉寬於詔獄。吏部侍郎奏言：陛下卽位之初，禁黜左道，邇來修設禱祀，溷瀆宮庭，且向來神氣精明，近則天顏異舊，豈鼎盛之年，忘在色之戒乎？不報。秋七月，給事中劉最疏劾太監崔文誘上齋禱，靡費無算，且與錦衣千戶陶澹羅織縉紳，大蠹反以賄脫。復匿錢甯厮養，上怒曰：劉最妄言，命黜爲廣德判官，尋遣戍。八月，進張鶴齡爲昌國公，詔留漕糧三十萬賑南畿，敵入階嶺口，復寇遼東。九月，遣官以銀二萬，糧九十萬，賑山東河南湖廣江西。冬十月，遣內官蘇杭織造，命廷和草敕，廷和諫不聽，乞休，允之。南京刑部主事桂萼上大禮疏，上嘉納之。

三年甲申，春正月，停解造軍器，免嘉湖稅糧，興國太后壽節，命婦朝賀，宴賚之。二月，昭聖皇太后壽節，免命婦朝賀，廷臣諫不聽，禁內外官交通藩府，賑淮鳳饑，敕伍文定捕盜賊，招張璫，桂萼於南京，召席書，翟輅於家，共議大禮。三月，詔定安陸州松林山爲顯陵，南京主事黃宗明，經歷黃綰，同璫，萼上疏議大禮。夏四月己酉，上昭聖皇太后爲昭聖康惠慈壽皇太后，興獻帝爲本生皇考，恭穆獻皇帝，興國太后爲本生母，章聖皇太后，皇考立室奉先殿側，曰觀德殿，詔誥天下，遣官迎獻帝主於安陸，魯迷貢獅子，厚牛，編修鄒守益，修撰呂柟，爭大禮。下詔獄。五月，停端陽龍舟戲。六月，鎮江海寇亂平之。陞張璫，桂萼，翰林學士，方

獻夫侍講學士科道官七十四人會劾璫等。下御史段續陳相於獄。餘宥之。修撰楊慎等三十六人劾璫等。奪俸。鴻臚卿胡侍吏部員外薛蕙以辯大禮下獄。謫降之。秋七月乙亥。改稱本生聖母曰聖母。章聖皇太后。戊寅。何孟春等二百二十餘人跪左順門內。大呼高皇帝孝宗皇帝。聲徹於內。上使內官諭退。朱希周復入內閣。要毛紀費宏石瑤同跪。言周廟之禮。至重至大。而本生二字爲安。陛下上承天命以臨。九有所恃者人心。若不從人。何以爲治。上復諭之曰。獻皇帝神主將至。册祝文悉已定。羣臣且退。仍伏不起。上乃下爲首者豐熙張狝等八人於詔獄。楊慎等撼門大哭。聲徹上聽。上益怒。命逮馬理等一百三十四人於詔獄。尋詔何孟春等二百二十人戍邊。杖豐熙等一百八十人於闕下。死者十有七人。己卯。尊上聖母號册。己丑。再杖楊慎等七人於闕下。甲申。獻皇帝主至京。奉安觀德殿。八月。大同兵變。殺巡撫張文錦等。命侍郎李昆齋赦宥之。代王出居宣府。九月丙寅。定孝宗稱皇帝。伯考。昭聖太后爲皇伯母。獻皇帝爲皇考。章聖太后爲聖母。詔告天下。冬十月。議遷顯陵。尋停。十一月。敵入延綏。大同兵復亂。尋定。十二月。四川賊陷婺川等縣。代王還大同。

四年乙酉。春正月。命諸郡織幣改貢金。始榷山海關。敵犯甘肅。邊將禦卻之。許魯迷入貢。詔免蘇松常逋稅三十八萬有奇。二月。日本使宋素卿伏誅。餘放還。獲大同叛卒爲首者斬。以徇。事平。三月。詔纂獻皇帝實錄。光祿署丞何淵請立世室祀獻皇帝於太廟。比太祖太宗。廷臣諫不聽。璫等皆以爲非。乃止。辛巳。昭聖皇太后所居仁壽宮災。延及玉德安喜景福諸殿。詔特立獻皇帝廟爲世廟。夏四月。查放宮女。五月。復

查革錦衣官九十餘人。六月赦高牆庶人家屬二百餘人。聽自便惠州。延平盜起。尋平。庚子進武宗實錄。秋七月。遣封故皇兄爲岳王。諡曰懷。八月。詔司設監兵仗局收工匠千名。冬十月。災變停工役。十一月。許市舶太監賴恩巡海。有警得調官軍。閏十二月乙卯朔。日有食之。

五年丙戌。春正月。大覲考察。遣內官督修真人府。廷臣請復議禮。痛斥諸臣。不報。二月。以上林鳥獸食肉。歲萬六千觔。米豆五千餘石。廷臣力言宜放遣。不報。徵龍虎山道士邵元節爲真人。賜銀印。賑畿內。三月。策士賜龔用卿等進士及第。出身有差。選袁袞二十人爲庶吉士。復遣內官督織龍絨。天方入貢。夏四月。敵犯宣大。拒卻之。五月癸未朔。日有食之。肇慶獠賊殺官大掠。久之乃平。六月。獻王實錄成。命姚鏐率兵討田州逆官岑猛。秋七月。魯迷復貢獅子。世廟成。九月己亥。上奉章聖皇太后謁世廟。岑猛奔歸順州。知州岑璋擒斬之。冬十月。旱災。免南畿山東浙江糧稅有差。十一月。營仁壽宮。

六年丁亥。春正月。詔曰。朕思民間疾苦。情狀不一。時所見或有未盡。匹夫匹婦。多有不被其澤者。其令諸司四品以上及科道官條疏利民事宜。以備采酌施行。所言務切政事。合民情。忠誠明晰。足以彌災變。以副敬天恤民之意。二月。改觀德殿爲崇先殿。召羅欽順爲禮部尙書。不至。三月。虜入宣府。參將關山戰死。考察京官。岑猛餘黨盧蘇等陷田州。據之。夏四月。改起羅欽順爲吏部尙書。不至。五月丁丑朔。日有食之。敵襲神木。六月。以新建伯王守仁總制兩廣。發內庫銀十五萬濟宣府饑。賑畿南。免馬價。增世廟武舞。秋七月。敵入甯夏塞。尙書王寬等禦卻之。斬首三百餘級。免山東稅糧。八月。命桂萼署刑部事。張璠署都察

院事。方獻夫署大理寺事。同讞逆賊李福達獄。先是李福達逃。曾以方術干武定侯郭勛。歸河南。更名張寅。巡按馬錄擒之。遂求助祕書干錄。錄奏聞。行撫按及布按訊之。皆言真。逮至京。會訊不決。復會訊闕廷。於是以桂萼等平反。因釋之。因逮繫馬錄、李珏、章綸、馬豸。及刑部尙書顏頤壽、侍郎劉玉、王啓、左都聶賢、副都劉文莊、大理卿湯沐、少卿徐文華、顧佖。及太僕卿汪元錫、光祿卿余才。給事中劉琦等十餘人。御史姚鳳鳴等十餘人。郎中評事劉仕等。於詔獄。編戍杖黜有差。一時凡詞連助者皆罪之。助會與萼、璫議大禮合。故有是獄。於是大禮稍忤者盡矣。九月。張璫以署院考察御史。黜謫十二人。冬十月。選提學官。詔翰林汪佃等十七人外補。以各衙門官代之。初定用京官外省主鄉試。十一月。修顯陵。十二月。大學士楊一清奏召閒住太監張永提督圍營。

七年戊子。春正月戊寅。廢秦府誠溧父子爲庶人。開新河。敵襲開原。敗去。二月。命復築甯夏邊城。官軍討青羊賊。敗績。庚申。命建敬一亭於兩雍。及天下儒學。田州平。三月。雲南定武土舍鳳朝文作亂。命伍文定討之。夏四月。五月辛未朔。日有食之。討斷藤峽賊。平之。六月。明倫大典書成。追奪議禮諸臣官。楊廷和等革削有差。秋七月。加上皇祖妣爲孝惠康肅溫仁懿順協天佑聖太皇太后。皇考爲恭睿淵仁寬穆純聖獻皇帝。聖母爲章聖慈仁皇太后。詔告天下。冬十月。命禮部大書天下災異。進覽。丁未。皇后陳氏崩。諡曰悼靈。後改諡孝潔。青羊賊平。閏十月。十一月丙寅。冊立順妃張氏爲皇后。新建伯王守仁卒於南安。十二月。韶散豹房諸禽獸。牙木蘭來歸。土番以入貢犯邊。邊將擊敗之。禮部侍郎嚴嵩使顯陵還。上靈異事。并

立石紀之上悅

八年己丑春正月大覲考察詔曰王守仁捷音多近誇詐其有功官軍俟查明敍賚然而擅離重鎮非事君之道其學術邪正功事真僞封拜當否其會官集議以聞廷臣上議曰守仁事不師古言不稱先欲立異以爲名則非朱熹格物致知之說知衆論之不與則著朱熹晚年定論之書招致生徒互相倡和才美者樂其狂遂流清談庸鄙者借其聲遂敢放肆其門人爲之標榜辨謗至謂杖之不死投江不死以上瀆天聽幾於無忌憚矣若剿漳寇滅逆濠功固足錄但賊平而縱殺不已報捷而誇張不實罪亦難原議上曰守仁放言自肆詆毀先儒用詐任情壞人心術至於宸濠之變仗義討賊功疑惟重封爵乃先朝信令准其終身仍諭天下敢有踵其邪說非聖者罪之二月初命臺諫官監收錢穀上計簿桂萼入閣辦事賑襄陽放鷹隼田犬置哈密諸夷於肅州三月祭酒陸深請於經筵凡天下政事得依經比義條悉奏聞降爲同知辛亥策士賜羅洪先等進士及第出身有差禁京師佛會海賊掠常熟桂萼奏革選庶吉士更定翰林官銓補法於是盡逐舊官置所陰厚朝野傷之復以人言選胡經等二十人爲庶吉士尋寢不行夏四月命廷臣四品以上各舉堪任知府翰林科道各舉堪任州縣者各一人旱免畿南稅糧及量免山東江北秋七月甲辰詔訪遺佚命採珠於廣東給事中孫應奎陸燦等疏劾張璫桂萼顛恣不法上怒下敕曰張璫自用自恣負君負國桂萼尤而效之言官屢劾朕不敢私論法當置典刑特從寬貸璫令還家創悟以資後用萼奪散官并舉士致仕去孫應奎等職居言官爲朕耳目素知大臣若斯卻乃坐視至今

首勅者免罪。餘下法司。九月。罷楊一清。召張璉還職。尋謫陸燦爲驛丞。餘降有差。復桂萼所奪官。冬十月。癸亥朔。日有食之。停外戚世封。有軍功者免停。詔免陝西江西災糧。敵犯榆林。王瓊禦卻之。十一月。停山海內官征稅。召桂萼復任。十二月。姜戎寇鞏昌。王瓊剿平之。革天下鎮守內臣。中外大悅。

九年庚寅。春正月。詔曰。周禮耕蠶分南北郊。其蠶於禁中。唐人便安之制。不可爲法。有司其於北郊建先蠶壇。酌治蠶之禮。定壇墼之向。制採蠶之器。擇掌壇之官。皇后親蠶。以供純服。凡制殺先農。十一。建具服殿。蠶室如古制。仍於西內營織室。以終蠶事。戊戌。敕有司議。以太祖太宗配天及社稷。二月戊辰。郊祭先農。耕籍田。三月。廷臣奏議郊祀典。逮霍韜下都察院獄。語詳郊祀志。初建朝。日夕月壇。丁巳。皇后行親蠶禮於北郊。遣官賑北畿河南山西陝西湖廣饑。詔曰。邇來遠近之民。餓莩載道。覽諸奏牘。深用憂戚。內外臣工。皆有分理之責。而部院大臣。又百僚庶司之首。不可不佐朕安民。其雜議救濟之實。以聞。於是發銀十五萬及免田租。發倉賑之。夏四月。楊一清削籍。霍韜還職。五月。興四郊工。以給事中夏言爲僉都御史。不拜。敵入漁陽。六月。議定樂律。乙丑。詔曰。朕覽天下土田之數。不及國初之半。必多欺隱。其括之。秋七月。革大臣櫛廕例。罷姚廣孝配享太廟。八月。方獻夫免。九月。給事中公請黜邵元節。下詔獄。冬十月。詔選妃嬪。命大臣子弟不得改翰林。陸夏言侍讀學士。仍給事中。改奉孔子爲先師。易像爲主。立啓聖祠。及釐正從祀諸儒。十一月己酉。初有事於南郊。詔大赦。十二月初立九嬪。桂萼罷。賜張璉名孚敬。土魯番入貢。始祀先聖先師於文華殿東室。大報禮成。釋囚千八百餘人。詔行郊祀祿禮。

十年辛卯春正月詔曰祖宗三途並用尤爲良法近來專務科舉之學偏重進士之選以致人尙浮辭不修實行今後三途並用必求得人以稱朕用賢澤民之意戊子初行祈穀禮於大祀殿奉太祖配行特享禮於太廟初正太祖南向位命有司集議禘祭大雩秋報禮二月庚辰初朝日建太神殿於南郊藏太祖神主建土穀祇先蠶壇於西苑議建太歲壇三月始立西苑耕種召張孚敬等同遊賦詩定西苑土穀壇曰帝社帝稷敵入大同西虜犯莊浪賜女直都督速黑忒金帶綵幣始用道士爲太常官夏四月丁巳皇后親蠶於西苑甲子上行大禘禮於太廟修仁壽宮五月壬子初有事於北郊革邊隘鎮守內官四川盜平六月召方獻夫爲大學士閏六月復誠意伯世爵及鄂曹衛信四公後各爲侯以劉基配享太廟大裁內外冗官秋七月彗星出東井張孚敬罷八月癸未初祭夕月壇再議遷顯陵辛丑改安陸爲承天府縣曰鍾祥免太原稅糧十之二丁未上觀穫於豳風亭召大臣賦詩九月乙卯上親祀風雲雷雨及山川神丙辰罷南京郊祀冬十月停遷顯陵議敵犯大同建零壇恤甯府庶人濬蘆溝等六河入海十一月甲寅大祀圓丘癸酉欽安殿啓建新嗣醮事以夏言爲監禮使大臣以次上香侍郎許鼎臣進步虛青詞丁丑召張孚敬還十二月以劾召用王瓊下南御史馬敷等十人於詔獄大修西苑諸殿亭池館

十一年壬辰春正月大觀考察遣官賑畿內留入覲四品以上官陪祀祈穀辛未祈穀二月幸南內敵犯榆林祈嗣於地祇壇望祭天下山川三月策士賜林大欽等進士及第出身有差乙巳皇后親蠶於西苑夏四月封常元振懷遠侯李性臨淮侯鄧繼坤定遠侯湯紹宗靈璧侯劉瑜誠意伯初營九廟五月遣官

詔琉球。秋七月。雲南貴州盜起。尋皆平之。八月己卯。彗星復見東井。勒張孚敬致仕去。甲午。上親祭歷代帝王廟。九月。賑陝西。冬十月。編修楊名以星變劾汪鏊。郭勛。邵元節等。及請釋議禮諸臣。停各工役。上怒。命逮繫詔獄。五毒慘酷。侍郎黃宗明救之。上怒曰。楊名死有餘辜。卽死何至傷仁明之治。命並逮鞠之。尋名戍邊。宗明貶黜。選進士錢亮等爲庶吉士。報罷。再敕選呂懷等二十一人爲庶吉士。南京御史馮恩劾張孚敬方獻夫汪鏊罪惡。逮下獄論死。十一月。遣官冊封琉球。庚申。祀園丘。敵犯寧夏。拒卻之。西域九十國王入貢。十二月。歲暮行大禋禮。

十二年癸巳。春正月。復召張孚敬入內閣。三月。上幸太學。謁先師。初開經筵。己巳。皇后親蠶於西苑。夏四月乙酉。上幸南內。召輔臣共閱馬賦詩。戊子。上幸西苑。召輔臣遊觀。詔求曾子裔孫。五月。西夷入貢。逮昌國公張鶴齡及延齡。詞連定公光祚。京山侯元。悉下詔獄。六月。彗星見於五車。方獻夫罷。秋七月。鳳陽撫臣請城鳳陽。不許。八月辛未朔。日有食之。香河縣忽自開新河一道。遣官祭之。己丑。皇第一子生。麗妃閻氏出。詔赦天下。獨大禮大獄不赦。九月。命按察司官得糾彈御史。廣東賊趙林花反。破平之。冬十月。海賊掠浙東。乙亥。大同兵譁。殺總兵李瑾。代王復走宣府。命劉源清等討之。丙子。張延齡論死。革鶴齡爵。停京考官。己卯。皇長子薨。諡哀沖。度天下道士一萬人。詔罷京官主考省試。十一月。劉源清討大同亂兵。戰於城下。遂圍之。十二月。敵犯寧夏。邊將禦大敗之。

十三年甲午。癸卯。廢皇后張氏。冊德嬪方氏爲皇后。嬉嬪沈氏爲宸妃。麗嬪閻氏爲麗妃。大同叛卒引敵

入塞大掠。遣官於各邊募兵禦之。時邊將失利。劉源清不能制。欲屠大同不果。遂謝事去。尋敵退。以戶部侍郎張瓚代平之。閏二月。詔令朝鮮使臣得出館遊觀。賑大同。三月上幸學。謁先師。夏四月。復正陽門。開稅。五月上幸南內。六月。土魯番入貢。以非期卻之。南京太廟災。秋七月。建神御閣於南內。奉祖宗御容。八月。建皇史宬。吉囊入榆林塞。大掠。月餘乃去。九月。建九五齋。恭默室。定九廟皆南向。逮劉源清等於獄。冬十月。命邵元節馳驛還山。詔免行刑。十二月。移置大同。從叛武官於遠衛。

十四年乙未。春正月。大覲考察。詔革諸管倉內官。莊肅皇后夏氏崩。諡曰孝靜。莊惠安肅毅皇后。祔葬康陵。二月初建九廟。三月。御經筵。及日講。以大行皇后喪。夏四月乙未。策士賜韓應龍等進士及第。出身有差。甲申。更定郊廟雅樂。上御文華殿親試。改趙貞吉等三十人爲庶吉士。五月癸酉。上祭地於方澤。建啓祥宮於獻皇帝誕生之處。於內作清虛欽安等殿。六月。釋御史馮恩戍邊。時汪鋹欲殺之。左都王廷相曰。祖宗朝不殺言官。然不可自今日始。會其母與子行。可上寃狀。上爲之動。命釋之。秋七月。汪鋹罷。初命貴州開鄉試。秋八月。吉囊入榆林。守將梁震擊敗之。甲辰。上祭夕月壇。乙巳。上幸西苑。召輔臣同遊。九月。建內西海神祠。遼東兵變。巡按御史曾銳撫定之。冬十月。選補嬪御。十一月。冊端嬪曹氏。延津縣民李拱辰獻女。上納之。上祀圓丘。詔再選女百人入宮。田州土目盧蘇殺其主岑邦相。

十五年丙申。西番烏斯藏入貢。二月。女直入貢。冊昭敬靜三嬪。九廟成。廖道南獻禮頌。廢韓府。高平王融。焯爲庶人。三月丙子。上奉皇太后。率皇后發京師。如天壽山謁陵。丁巳。駕還。夏四月。詔曰。朕法祖宗。預作

幽宮。茲擇地於長陵左十八道嶺。諮問臣民。僉云宜建。有司其經理之。薦西苑新麥於內殿。敵自賀蘭山入犯。邊將數破走之。改建武學。以文武重臣主教事。丙申。行大禘禮。增皇初祖神主。癸卯。復幸天壽山。改十八道嶺爲陽翠嶺。命拓景陵。癸丑。還京。五月。重修宋史上幸西苑。召郭勛。李時。夏言。汎舟。上親製行幸大武龍威冠服。詔求紅黃玉禮神。除禁中佛殿。建慈慶慈寧兩宮。焚佛骨萬三千觔。毀金銀銅佛像一百六十餘座。六月。釋劉源清等。秋七月。斷藤峽賊攻殺戍卒。命侍郎蔡經討之。韶陵殿并祀孝肅孝穆孝惠三后。八月。陽曲王府宗室知斌等結衆於中條山。捕之。尋獲平。九月。各邊立武塾。教將士子弟。敵入延綏。官軍四戰皆敗之。入寧夏。又敗之。庚申。冊七妃四嬪。庚午。上如天壽山。丁丑。還。冬十月。戊子。皇第二子生。詔赦天下。更世廟曰獻皇帝廟。改謚悼靈皇后曰孝潔。遷主於奉先殿西室。加謚孝靜皇后曰孝靜。莊惠安肅溫誠順天偕聖毅皇后。十一月。寇入山西。尋去。免被寇地方田租一年。十二月。詔文武人才各舉所知。薊州開採。閏十二月。詔曰。朕創昭穆羣廟。以祀祖宗。彰太祖爲常尊之主。復作太宗廟於羣廟之外。表著功德。享祀百世。更創皇考廟曰獻皇帝廟。止修時祀。以避豐禰之嫌。由是致孝慈闈。恭上皇伯母徽號曰昭聖恭安康惠慈壽皇太后。聖母彰聖慈仁康靜貞壽皇太后。慶禮旣備。推愛宜頒。故告萬方。廢后張氏薨。初祀先醫於聖濟殿。

十六年丁酉。春正月癸卯。上第三子載坫生。是爲穆宗莊皇帝。二月。以福建廢寺田給貧民。閉永平礦。刑部上文武坐事應赦者一百四十二人。上曰。馬錄。李經。馮恩。楊慎。王元。劉濟。豐熙。邵經。邦不赦。餘宥之。罷。

皇后親蠶。癸酉上奉皇太后率皇后如天壽山。三月命建離宮於沙河。費直七百萬。甲申還。以郭英從祀太廟。夏四月。上幸金山。視行宮。癸丑還京。進封貴妃王氏等。五月。有司請立皇太子。不許。請預擇師保賓客。許之。六月。開天下礦洞。貴州凱苗叛。尋平。戊戌。謹身殿災。詔求直言。作養心殿。秋七月。涇王祐楫薨。無子。國除。八月。敕兩廣守臣會討南安。敵入大同。九月。以應天策文有譏戎祀語。逮試官江汝璧。歐陽衢於詔獄。革應天鄉貢士。應制南宮。清江南田賦。逮張鶴齡於獄。瘐死。冬十月。作崇德殿。十一月。命大臣被論不必互辯。傷國體。

十七年。戊戌。春正月。大覲。考察天方國入貢。二月。開房山銀洞。許應天貢士入國子監肄業。給真人張彥獮敕書。再訊張延齡籍其家。告訐人劉東山。荷校死。濬青登萊新河。濬薊州運河。三月。策士賜茅瓚等進士及第出身。有差。敵入薊州。馬永戰卻之。夏四月。增西苑督農尙書。停遣安南文武大臣。賑京師。甲申。上零敵犯大同。張世忠破走之。五月。復設鎮守內官。革臺諫官監收錢穀。定武舉試卷分邊復南字。詔毀天下書院。六月。詔廷臣集議明堂秋饗禮。秋七月。旱。免山東夏稅。八月。吉囊犯河西。劉天和禦敗之。九月。改太宗廟號成祖。獻皇帝廟號睿宗。以睿宗祔享太廟。詔告天下。乙未。上如山陵。行秋祭禮。丁酉。還宮。冬十月。行大享上帝禮於玄極殿。奉睿宗配。十一月。改上皇天上帝大號。改太祖及高皇后諡。詔赦天下。十二月。癸卯。章聖皇太后崩。議遷顯陵於大峪口合葬。壬子。上親詣相度。發京師。甲寅。還宮。己未。詔停遷顯陵。自往承天相視修拓。丁酉。上諡曰慈孝貞順仁敬誠一安天誕聖獻皇后。

明書卷十四

本紀十一

世宗肅皇帝本紀二

十八年己亥春正月詔曰朕惟孝子事親送終爲大皇考陵寢建造狹隘雖嘗增修猶多未稱朕將躬詣陵下與諸大臣周閱山川更卜吉兆重建玄宮以安皇考皇妣之靈擇於二月望日子夜發京師中外其悉知之進封武定侯郭勛翊國公起大學士翟鑾改兵部尙書兼右都充行邊使因發帑金五十萬分勞沿邊將士嚴防關隘造御寶十一方二月册立皇次子載灃爲皇太子封三子載圜爲裕王載圳爲景王載皐載壘載墳載壘俱殤追封諡爲穎殤王戚懷王薊哀王均思王鑄嘉靖通寶錢道士邵元節死贈少師諡文康榮靜遣表薦其黨陶典眞俗名仲文封爲神霄保國宣教高士南巡以郭勛爲都護將軍成公希忠副之咸寧侯仇鸞東寧伯焦棟爲左右副將軍率六軍從行命皇太子監國時四歲敕宣城伯衛鐔遂安伯陳鏞同大學士顧鼎臣等輔導留守張瓚贊機務文武大臣十八員守九門乙卯駕發京師中宮從行所至望祭山川遣官祭所過帝王聖賢祠墓乙丑次彰德趙王厚煜迎於漳水朝行殿丁卯上次衛輝汝王祐棹來朝夜行宮火延及御寢上倉卒莫知所避錦衣指揮陸炳排闥負上出煙火中宮婢死者

數十人。法物燬者半。上命括遺物。逮巡撫易瓚。巡按馮震。及布按諸臣於詔獄。有司縛前驅侍郎。蔡經平藤峽賊。捷聞行在。以供具不辦黜保定巡撫陸釗等。三月己巳。渡河。周世孫朝。壩來朝於鄭州。辛未。徽王厚爨朝於鈞州。乙亥。唐王宇溫朝於南陽。伊王訐澹失郊迎宥之。己卯。上至承天。入舊邸。壬午。謁顯陵。祀龍飛殿及社稷山川。乙酉。大祀顯陵。楚王顯裕來朝。戊子。上相度顯陵及山川。乃宣諭羣臣。遂寢遷陵議。時侍讀學士廖道南居憂。以緋衣朝上。獻南巡江漢賦及慶雲頌。上怒其居喪衣緋。奪其官不敘。後四獻箴頌不報。辛卯。上以回鑾告祭。遂發承天。命改戶部侍郎顧璘於工部。營顯陵。免承天引賦三年。湖廣諸府十之四。河南十之三。夏四月。上次滎澤。見饑民。發白金二萬賑之。良鄉離宮成。壬子。上還自承天。告廟以選宮寮。及進敕草遲慢。奪夏言勳階散官。及括所御賜記劄。尋言抵潞河。上念之。召還。五月。命承天。真興都留守司甲申。獻皇后靈輜發京師。停大峪口。上更定宮寮。六月。賚扈侍南巡官。秋七月。閏七月。遼東兵亂。馬永討平之。免湖州田口十之四。斷藤賊復平。庚申。顯皇后合葬顯陵。敕咸寧侯鸞兵部尙書毛伯溫南征。八月。考察京官。壬辰。建皇穹宇。九月乙未朔。日有食之。冬十月。太僕卿楊最上言。皇上端居恭默。保復元陽。不求仙而自仙。黃白之術。金丹之藥。不可服用。上覽大怒。命逮下詔獄。瘐死。十一月上祀園丘。十二月。賑河南饑。

十九年庚子。春正月。行邊使霍鑾復以原官入閣。二月。御史姚虞上承天流民圖。上命賑之。罷武舉科。營興邸。用白金四十七萬。三月癸巳朔。日有食之。營仁壽宮。敵入榆林大掠。尋破走之。竹谿盜起。尋平。夏四

月。羌僧入貢。沙寇秦璠叛。詔都督湯慶討之。修宣府邊二萬五千丈有奇。日本入貢。五月。選淑女一百人入宮。秋七月。土魯番入貢。卻之。八月。詔南京鑄嘉靖通寶錢。敵入寧武。十餘日乃去。九月。劉天和等大破敵於花馬池。冬十月。罷各處礦場。十一月。加方士陶仲文少保禮部尙書。十二月。許鳳陽守備太監統攝江北府州縣。安南莫庸來降。

二十年辛丑。春正月。大覲考察。免蘇松稅糧。御史楊爵奏諫。上失人心。致危亂者五。上怒。命長繫詔獄。二月。以黃白方不驗。下方士段朝用於詔獄。敵入甘肅。戰勝之。三月。策士賜沈坤等進士及第。出身有差。夏四月辛酉。九廟災。詔天下停工。詔極言得失。罷大禱禮。賑畿內旱蝗。五月。起工部侍郎潘鑑督採木。罷鑄錢。山東盜起。詔安南國爲安南都統使。司以莫庸爲都統使。六月。毛伯溫班師。賑山西。開原虜求增人入貢。不許。大掠邊將劉大箴等破卻之。秋七月。隆慶州妖賊張雄等反。討平之。八月辛酉。昭聖皇太后崩。諡曰孝康。靖肅莊慈哲懿翊天贊聖敬皇后。虜俺答入大同。掠山西。入寧武。總兵丁璋等戰死。尋出塞。郭助被劾下獄。詞連英公鎔。惠安伯張鑣。亦下獄。上曰。郭助受朕恩眷。卻乃交結逆囚。包藏禍心。迹此一端。其他可知。朕以倫序當立。張延齡謀爲不軌。人孰不知。助也敢復黨之。其詳讞以聞。九月。勒夏言致仕。尋復。冬十月。賑山西被寇地方。十一月。復停采礦。辛卯。敬皇后合葬秦陵。郭助論斬。瘐死獄中。上親考庶吉士。欽取高儀等三十三人。十二月。免山西糧稅有差。

二十一年壬寅。春正月。二月。安平伯方銳進爲侯。城臨清。夏四月。召墾沂州荒田。五月。瓊州黎賊反。平之。

閏五月六月夏言免上手諭其罪狀。虜俺答十萬騎入寇。過朔州至馬邑。及廣昌。邊將周宇戰死之。入鴈門。犯太原。平陽。澤潞。秋七月己酉朔日食。既以不糾。夏言降道科十三人。奪俸六十人。平陽知府聶豹勒兵禦敵。斬零級敵北走。命翟鵬總督山西。山東河南兵。敵回掠太原忻崞代。出鴈門。自白草溝北走。前後二十一日。副總兵張世忠追敵。力戰死之。予贈立祠。發庫銀十萬賑山西。仍免田租二年。嚴嵩入閣。言官鞏劾之不聽。九月上命修雷廟於黃州。工部員外郎劉魁諫。杖錮之。冬十月郭勛死。宥其妻子免籍沒。丁酉上幸曹妃宮。宮婢楊金英等怨上。共謀弒。以組經上頸。以釵股刺其囊。上幾危。宮婢張金蓮走白后。后馳救上蘇。后命收曹妃及金英等磔於市。族其家。上知曹妃冤。甚憫之。上移御西苑。自是不復還大內。加太醫許紳尙書太子太保。十二月詔修三皇廟。以古醫三十四人從祀。

二十二年癸卯春正月丙午朔日有食之。貴州苗亂。流劫湖廣。二月七陵工完。上如天壽山。五日還。毀大慈恩寺。逐番僧。夏四月安南入貢。命五開諸蠻附貴州鄉試。五月千戶火力赤襲敵。斬獲而還。賞之。秋七月上大雩。獲雨。敵犯延綏。擊敗之。嚴嵩陷御史葉經。杖闕下死。冬十月復太廟合饗制。

二十三年甲辰春正月徵各鎮官戍大同。大覲考察。復鑄嘉靖通寶錢。三月敵犯宣府。邊將禦破之。策士賜秦鳴雷等進士及第。出身有差。詎訪絕力人。夏四月安南入貢。秋七月取太倉銀十萬入內。敵入大同。周尙文擊走之。免畿南田租之半。賑湖廣江北。復設武舉科。冬十月敵攻膳房堡。邊將郤永禦之不得入。自萬全右衛入掠蔚州。入浮圖峪至完縣。京師戒嚴。命列侯督營衛鄴城。敵從天城去。十一月方士陶仲

文竝加三孤。

二十四年乙巳春正月大修宣大山險己酉楚世子英耀弑其父楚王顯榕事發尋伏誅閏正月命廷臣見皇太子二月撤元世祖像并祭三月考察京官賑應天饑夏四月停開納事例日本來貢卻之五月壬戌朔日有食之遣內官封朝鮮國王復開納事例六月旱免陝西田租皇乾殿成秋七月收原賜勳戚旅舍定太廟不論昭穆以太祖居中左成宣憲睿右仁英孝武西海敵來降八月加陶仲文伯爵辭許之敵犯大同總兵張達等力戰遁去令文選司於各部調用發內帑金四十萬於邊冬十月大同宗室充灼等謀反覺捕鞠之尋伏誅十二月戊申復召夏言至京令長史官以經義祖訓授諸王子

二十五年丙午春正月沅江土舍那鑑殺知府那憲命討之取河南山東民兵備敵三月四川白草番叛命都御史張時徹等討之夏四月以曾銑總督陝西三邊五月敵入延綏隱敗奏捷逮治總督張珩等秋七月收山場陂湖河道稅敵犯保安入慶陽深抵西安尋去敵入宣大邊兵敗績水災免畿內山東糧冬十月曾銑請復河套上方略萬言詔修復河州屯地墾萬餘頃延津人李拱辰子應時復獻其妹上納幸之

二十六年丁未春正月大覲考察賑延綏賜徽王厚熾真人金印詔南將歸南北將歸北著爲令定兩雍官選風憲選淑女三百人入宮二月朝鮮執獻通倭舶三百餘人三月策士賜李春芳等進士及第出身有差上親賜題考取亢思謙等二十八人爲庶吉士山東汶上盜田斌等作亂都御史詹瀚擒平之白草

番平夏四月虜俺答求入貢拒之五月曾銑襲虜破之六月加陶仲文柱國兼支大學士俸任子爲尙寶丞秋七月倭寇浙東八月災傷免湖廣山東田租十之三閏九月兀良哈寇遼東冬十月兀良哈糾建州同入遼東曾銑復陳復河套方略及圖說十一月宮中火詔釋獄囚乙未皇后方氏崩諡曰孝烈丁酉詔曰曩者虜據河套爲國家患朕軫懷宵旰有年念無任事之人今銑前後上方略爾兵部卽會同廷臣協忠據謀以圖廓清其定策以聞十二月曾銑劾甘肅總兵咸寧侯仇鸞貪暴逮鸞下詔獄令諸臣雜上復河套議

二十七年戊申春正月嚴嵩陸炳陷夏言黨信曾銑上怒奪言師傅罷之賑漢中二月仇鸞噬逮曾銑讞之遂逮夏言坐銑交結近侍官員律三月丙子朔日有食之癸巳上殺總督三邊侍郎都御史曾銑流其妻子及籍其家無餘貲天下冤之夏四月讞大學士夏言坐前律五月定壽陵名曰永陵葬孝烈皇后日本入貢周府中尉勤熨疏諫上厭萬幾興齋醮引秦皇漢武爲比上大怒降爲庶人發高牆六月海賊亂官兵擊敗之秋七月夏言妻蘇氏請代言死不許辛巳鄭王厚烷上箴及連珠以簡禮怠政飾非惡諫求仙土木爲規上怒曰爾探知宗室有謗訕者故茲效尤爾真今時之西伯也欲爲則爲之八月加陶仲文伯爵俸敵攻大同不得入周尙文出塞戰彌陀山勝之九月敵入宣府邊將力禦之去冬十月癸卯上殺少師大學士夏言賜遼王憲爍道號真人敵復入宣府抵懷來大掠而去十二月兩廣兵討連山賊破之築潮河川城

二十八年己酉春正月套虜自西海還掠鎮羌邊將禦卻之敵入大同塞指揮江瀚等迎擊無援戰死周尙文帥師來援大破之斬獲頗多總督翁萬達引兵至敵遂遁去二月教場閱列侯武職藝指揮鄭璽訛言寇至衆驚逮革之虜求貢不許三月辛未朔日有食之乙酉皇太子冠丁亥薨諡莊敬夏四月崇陽王顯休毆兄有罪賜死秋七月徙肅州屬夷於塞外七百餘帳九月敵寇榆林擊卻之水災免嘉湖秋糧加賑冬十月詔總督張嶽帥兵討銅仁叛苗甲申孝烈皇后祔廟十二月令郡王不得封繼妃

二十九年庚戌春正月大覲考察上會計錄三月策士賜唐汝楫等進士及第出身有差命郭勛子守乾襲爵夏四月黃河決入淮逼祖陵開直河以通下流封陶仲文爲恭誠伯辭許之六月戊午敵犯大同總兵張達等戰死之閏六月旱災免北畿南畿山西夏稅十之三秋七月癸卯命保定巡撫楊守謙督二將軍駐通易總兵劉鼎等六將軍分戍關隘西海夷及套虜朵顏合十餘萬近邊謀深入詔各邊嚴備旱免陝西夏稅八月甲子敵入犯宣府大掠入窺大同仇鸞奏敵東行且薊遵恐近京師乃移軍居庸以邊兵京兵益諸隘口敵東走攻古北口都御史王汝孝以火攻卻之敵乃伴督衆攻而別從間道至黃榆溝丁丑入塞汝孝兵大潰敵轉掠懷柔諸縣聞保定兵駐城中戊寅遂逼通州巡按王忬先期駐通州艫舟潞河西阻之不得渡分掠畿輔忬令人夜走京師請援上聞命王儀率兵赴援而分文武大臣守九門以吏部侍郎定西侯蔣貴總督之虜大衆營白河是時仇鸞以大同兵至楊守謙首以保定兵至徐仁以延綏兵至已而宣府山西遼兵皆至凡七鎮上乃拜鸞爲平虜大將軍總諸鎮兵賜玉帶密敕曰朕所重惟卿

一人陞守謙爲兵部侍郎。專衛都城。陸炳督諸門事。譏察都御史商大節防內覺。於是宥獄中戴綸。歐陽安從戎。分京兵屯巷陌。京兵見敵皆泣不前。時勤王兵皆輕騎。至不齎糗糒。上命犒之。文移往復。三日後。僅得數餅。旣發粟。釜甑無辦。士卒饑疲甚。上怒責計部官。皆禡服。辛巳。敵渡潞水西北行。大掠焚廬舍。火逼空。壬午。薄都城。執御廩內官去。見曾曰。若歸見天子。好爲我致書。書多媵語。求入貢。上召嵩等入見。授劄令各陳所見。羣臣相顧莫敢發。司業趙貞吉抗言。此不必問。恐後生懦夫。闡於事。敵犯都城。震宮闕。乃許之貢。何異城下盟。不可檢討。毛起曰。時事孔棘。姑許之。俟出塞。乃卻。貞吉叱其謬。業已上聞。奏入。時晡。上見烽火逼都門。甚懼。馳騎召貞吉入奏。貞吉大言。陛下宜御奉天。下罪己詔。速獎故都督周尙文功。并釋沈束獄。以作人心。士卒不力。以主將多冒首功耳。今募一首。予百金。捐十萬敵。且立盡。上乃詔貞吉兼御史。齎萬金往募首功。癸未。敵自鞏華犯諸陵。轉西掠真保。皆震。甲申。亭午。上出御奉天殿。敕逮都御史王儀。王汝孝。總兵羅希韓。卽訊。汝孝道梗不及逮。時儀守通州。會鸞兵掠食村落。儀捕得斃之。鸞兵譁。爲御史劾。逮至削籍。超擢王忬爲都御史。守通。時承平久。忽遭變。兵部尙書丁汝夔束手無措。卽偵報皆不前。祇以避寇者訛言入報。再遣亦然。日數十報。城中日數驚。於是大同故爲寇裝。掠畿輔無所忌。卽捕之。曰。遼軍鸞方寵盛。人不敢忤。大同軍而上。又以入援爲諸鎮先。不繩以法。汝夔輒令曰。勿捕大同軍。故益橫。又自稱遼軍。遂謗汝夔私其鄉人。及敵薄城。汝夔受計於嵩。令諸將勿戰。敵飽自去耳。諸將固不敢戰。乃諉曰。汝夔禁勿戰。語稍稍聞禁中。而鸞故率軍屯遠郊。詭云擊敵酣戰。惟守謙屯城下。兵少不能戰。城

中望見之。而鸞之恇怯無從驗。時寇多殘。中官莊園。中官遂謗守謙貳於寇。上怒。命執守謙下獄。卽軍前。逮守謙。丙戌。刑部彭黯等會訊。擬守謙斬。具爰書少緩。上益怒。并逮黯等。廷杖之。時敵東去。丁亥。上殺兵部尙書丁汝夔。都御史楊守謙以徇。廷議貞吉狂誕。謂其巧申理。周尙文沈束。齎金不獲首功。杖謫之。己丑。敵滿載北去。欲西奪白羊出塞。乃留餘寇疑我師。乃西至昌平。猝與鸞遇。縱騎蹂躪。鸞軍潰。幾不免。幸脫。敵遂自古北出塞。鸞獲殘寇先後二百級。廷臣劾宜驗真僞。上竟進鸞太保。賞賚甚厚。汝孝雖被逮。未至。臨敵獲首功。未減戍邊。九月辛丑。敵盡出塞。立戎政府。以仇鑾入理戎政。發銀米賑被寇地方。散遣入援官軍。命科道七人分道募兵。壬子。廢鄭王厚烷爲庶人。發高牆。免山西遼東屯糧。冬十月。城通州。祧仁宗廟。祔孝烈皇后。十一月。以易昌通爲三輔。置經略大臣。廣開事例。募富民出粟助邊。十二月。仇鸞率師襲敵。無功而還。不問。張嶽征諸苗破之。

三十年辛亥。春正月。錦衣經歷沈鍊劾嚴嵩父子姦貪十大罪。上怒。杖闕下。發邊外。三月初。許虜通馬市。兵部員外楊繼盛極言開市之非。上曰。小臣狂妄。撓阻邊計。因訊杖降典史。湖廣苗寇亂。張嶽分兵破之。考察京官。盡徵天下餘銀給馬市。夏四月丙戌。遂開馬市於大同。寬海禁。五月。命宣府威甯一體開市。六月。仇鸞請騎兵行營許食民禾。不允。秋七月。勒諸王進銀助邊。八月。流江盜那鑑殺雲南布政徐樾。官兵討之不克。改部屬及進士於制誥兩房。災傷免。江西湖廣稅糧。冬十月。虜俺答獻我叛人蕭芹等於塞上。侍郎何棟獲逆人哈舟兒等。獻俘伏誅。十一月。虜求以牛羊易穀豆。不許。因入寇大同。

三十一年壬子春正月敵犯大同二月復犯大同上怒曰虜寇日擾邊官兵不能防禦顯是專倚互市不爲隄備故命一意戰守罷馬市敵殺指揮王恭南孫懷仁營復內教場修太和山玄帝宮三月裕王景王行冠禮戊子詔仇鸞率兵如大同勦敵命造二王府第海寇犯瓊州殺官大掠夏四月補築宣大邊牆益兵守之禁王府收置民田仇鸞出塞斬寇首五級亡官卒一百五十餘人賞之上促鸞勦寇鸞畏縮不敢動嵩白其狀上自是知鸞不足恃倭掠漳泉五月召仇鸞還京六月仇鸞請調京兵戍宣大不許城順義秋七月八月奪仇鸞大將軍印敕鸞恚死選翰林爲二王講讀官己巳二王出閣講讀梟仇鸞示九邊籍沒其家敵聞鸞死遂引去停各邊馬市水災蠲賑淮徐冬十月敵屢入犯仇鸞敗上曰楊繼盛言驗矣遂復爲兵部員外郎侍郎張嶽獲龍許保等平之十二月選民間女三百人入宮

三十二年癸丑春正月戊寅朔日有食之大覲考察南兵勦那鑑自殺餘黨悉降庚子楊繼盛上言劾數嚴嵩專擅十大罪惡引二王上怒曰何爲引二王繼盛對曰非二王誰不憚嵩者且二王家事甯不慮爲嵩敗耶錦衣文致其詞命杖之令擬罪刑部何鼐受嵩指論絞郎中史朝賓持不可嵩申法謫之時王學益贊鼐遂成獄二月乙卯冊李氏爲裕王妃倭犯温州守將湯克寬擊破之三月賑陝西戊子策士賜陳謹等進士及第出身有差選萬浩等二十八人爲庶吉士敵犯宣府參將史略戰死孫邦丁碧禦卻之閏三月城京師外關夏四月倭寇浙東入南畿殺官掠民命湯克寬討之革三輔經略山東盜李之強流劫江北尋平秋七月敵大舉入犯抵渾源廣昌攻紫荆指揮袁鏞力戰死不得入遂入甯靜口關南大震遊

擊陳鳳朱玉等力戰卻之。八月，河南賊師尙詔入歸德，破柘城睢州二十餘州縣，官兵敗之。尋平。九月，敵自大同掠山西，二十一日乃去。冬十月，免畿內浙東秋糧，倭船至興化，殲之。十一月，城浙東平湖等五縣。十二月，敵攻古北口，侍郎楊博拒卻之。

三十三年甲寅，春正月，賀疏失擡杖六科都給事張思靜等各四十。壬子，康妃杜氏薨，是爲穆宗生母。官軍圍倭於南沙不克，賊遁去。二月，敵犯大同，薛燾戰死。三月，令凡軍官犯罪子孫革職。倭入江北，犯青州。夏四月，楚盜起，倭轉掠浙西，破州縣。五月，御史宋儀望請疏桑乾河，通宣大餉，不果。六月，敵入大同，總兵嶽懋戰死，隨射書求市，不許。秋七月，倭自松江入海，俞大猷追敗之。八月，敵犯朔州，六日乃去。命市龍涎香。九月，停蘇松租一年。倭寇海門，副使張景賢殲之。生番犯陝西，擊卻之。冬十月、十二月，敵入大同，總督許論、都御史王忬共擊走斬獲，追出塞。

三十四年乙卯，春正月，命豐潤伯曹松督兵於孝陵防倭，蜀蘇松逋賦。二月，罷開膠萊河。三月，湖廣猺及四川容山苗平。夏四月，倭復犯淮揚，總督張經再破倭於江口，淮揚兵破倭於狼山。五月，倭至日照。甲午，張經督兵大破倭於王江涇。己酉，督察趙文華陷逮張經，下詔獄，賞趙文華銀幣，開建甯鐵冶。六月，俞大猷破倭於海浦，又戰於平望及馬蹟山，皆破之。至馬頭鎮滅之。秋七月，播州寇亂，平之。新倭復入犯南京。至溧水。八月，賜徽王載堦號真人，給金印，參政任環討倭破之。趙文華攻倭於華亭，敗績。敵犯宣大，擊遁去。都御史曹邦輔邀擊倭於潞野，殲其一股。台州兵擊倭殲之。九月，選女子一百六十人入宮。冬十月，壬

成裕王第一子生庚寅上殺兵部員外郎楊繼盛十一月壬辰朔日有食之倭掠海鹽迎擊殄之閏十一月趙文華督酉陽兵遇倭大敗奔蘇州諸軍皆敗十二月開四川山東礦洞壬寅山陝河南同日地震死者八十二萬餘人趙文華乞還京許之

三十五年丙辰春正月大覲考察給事中梁夢龍劾吏部尚書李默剛褊貪汙詔不問二月遣官祭山陝河南山川詔罷直浙總督楊宜以胡宗憲爲兵部侍郎代之三月逮繫吏部尚書李默於詔獄論死以大學士李本攝吏部事於是與嚴嵩共鋤排異己以懾衆遂請品第諸臣以爲去留許之其上二十有八人吳鵬趙文華嚴世蕃等其中七十人鄒懋卿等其下十五人宜斥免南京吏部尚書楊行中等又考察科道三十人罷黜降調有差留用御史二十人各杖四十顯陵成修營十年董督官陞賞有差策士賜諸大綬等進士及第出身有差恩榮宴特命錦衣陸炳坐尚書班夏四月倭寇温州同知黃釗逆戰死之據詔安官軍破殲之倭薄崇德遊擊將軍宗禮等逆戰於皂角林死之倭焚運船五月乙亥倭泊漁山洋聽撫以趙文華總督浙江建眞武廟於齊雲山六月俞大猷追倭於海洋大破之秋七月廢徽王載榦爲庶人自殺巡按趙孔昭等與胡宗憲招撫毛海峯賊散其黨會兵進圍乍浦巢大破平之八月詔採芝九月敵襲喜峯口王忬禦走之冬十月丙戌朔日有食之趙文華還京敵入內地殺總兵殷尙質己未免大學士嚴嵩廷賀肩輿入直錄平倭功趙文華等陞賞有差十二月俞大猷破温州殘倭及舟山倭殲平之三十六年丁巳春正月閉近畿銀礦二月城寶應考察京官三月敵入榆林陳鳳戰死倭復寇甯波大掠

胡宗憲議招納不擊。夏四月丙申。三殿奉天門午門災。建奉天門及午門辛丑告郊廟。詔赦天下。五月量釋高牆庶人。六月虜入薊鎮。副總兵蔣承勳戰死。寇宣府。祁勉戰死。乙酉。副使于德昌破倭。斬其酋。乃開洋走。秋七月。九月。奪趙文華職。戍其子懌思。冬十月。天下獻芝一千六百餘本。楊順路楷希嚴指。殺前錦衣衛經歷沈鍊。任順子錦衣千戶遷楷太常卿。順復殺鍊二子。嫡子襄幾死。順楷敗。乃脫。重建奉天等殿。十一月。蜀山東糧賑之。十二月。嘉湖妖賊馬祖師作亂。討平之。祖師遁。災傷免浙東及遼東糧稅。敵圍大同兩閱月不解。

三十七年戊午。春正月。琉球國王破倭還。難民降。敕獎之。二月。廣東倭亂。官兵攻之。敗績。三月。楊順路楷欺蔽。逮問。遣戍。遣官賑遼東。戊辰。右衛將尙表出城突戰。斬獲而還。給事中吳時來。刑部主事張紳。董傳策。各劾嚴嵩父子欺橫罪惡。各廷杖。遣戍。夏四月。遣官冊封琉球。新倭大至。犯福浙。裕王妃李氏薨。命楊博率兵援右衛。虜遁圍解。發銀賑之。五月。福建參將尹鳳破倭於海口。蜀大同稅糧。秋七月。會舉將材。閏七月。敵入內地。擊走之。八月。敵犯赤城。九月甲戌。冊陳氏爲裕王繼妃。冬十月。天下進芝一千八百餘本。命職方司郎中唐順之如浙。協胡宗憲勦倭。十一月。番夷犯莊浪。蜀江北湖廣水災。糧有差。三十八年己未。春正月。王忬率兵大破敵於內地。斬首八百有餘。遺器畜物無算。甲午。賜嚴嵩苑中乘肩輿。支伯俸。二月。募兵山東赴浙江。三月。敵入自遵化大掠畿輔。五日而去。策士賜丁士美等進士。及第出身。有差。夏四月。裕王長子薨。追封裕世子。鄒懋卿嗾方輅劾忬。逮下獄。世蕃文致其讞。論死。參將黎鵬破。

倭於福州副使劉景韶殲倭於通州。盧鏗敗倭於三沙。都御史李遂討倭大破之。遂出海走。五月倭走梅花洋。官軍邀擊破之。六月募民開宣大荒田。改楊博總督薊遼。秋七月劉景韶復破倭。八月江北倭盡爲劉顯所殄。賑遼東。冬十月定死事條例。

三十九年庚申春正月修都城。從嚴嵩奏以鄢懋卿總理天下鹽政。二月大同總兵劉漢出塞擣敵大勝而還。敵徙幕遠去。上以請建皇儲殺中允郭希顏仍傳首天下。三月南京兵亂殺督儲侍郎黃懋官侍郎李遂撫定之。斬首逆。夏四月賑畿輔。五月潞城府中尉俊彙有罪自殺。秋七月敵犯大同轉掠五臺崞縣。十四日乃去。冬十月上殺侍郎都御史王忬及給事中楊允繩。庚申趙王厚煜自縊歸罪彰德府官譎斬有差。十一月方士陶仲文死諡榮康惠肅。

四十年辛酉春正月分遣御史於天下訪求仙術異人及符篆祕方。二月辛卯朔日有食之。丁未景王之國常德。夏四月獎慶王璉枋賢行。敵入延綏殺繕卒三千人。閏五月免嚴世蕃母喪守制。建仁和宮。秋七月己丑朔日有食之。九月敵犯居庸圍總兵姜應熊參將胡鎮力戰救出之。廣賊袁三作亂自江西流入福建轉掠浙江。冬十月廣賊復入江西守將戚繼光擊破之。遁去。十一月萬春宮成。萬壽宮災。上移居玉熙宮。十二月重營萬壽宮。

四十一年壬戌春正月萬壽宮成。內建壽源萬春太玄仙禱諸殿極其宏麗壯過大內。上見之悅加賚有差。大觀考察。二月詔罷親耕親蠶禮。三月策士賜徐時行等進士及第出身有差。夏四月乙卯上御新宮。

五月詔停選庶吉士。漉安知縣海瑞見世蕃不屈，鄢懋卿嗾御史袁漉劾之，落職。御史鄒應龍劾嚴嵩及子世蕃、孫鵠、鴻家奴嚴年中書羅文龍等惡蹟，詔嵩致仕。世蕃等戍繫有差，遷應龍通政參議，免嵩黨劉伯躍等官。六月，廣東盜張連伏誅。秋七月、九月，諸殿閣門戍，更命名。詔天下冬十月，刑科給事中陸鳳儀勦胡宗憲罪惡，逮下獄，尋釋削籍。復遣御史姜儆等分訪法士方書，倭陷興化，劉顯兵不動，乘機擄掠。賊據興化三月乃去。十一月，裕王第二子翊鎬薨，追封藍田王。

四十二年癸亥春正月，詔復淮鹽舊額百萬爲六十萬。二月，大察京官。御史姜儆進祕書，倭陷甯德及平海衛。三月，御史王大任進祕書。夏四月，嚴嵩進祈鶴文符及法祕，命纂興都志，副總兵戚繼光等大破倭於平海衛。海寇悉平。五月，安南入貢。復逮胡宗憲下獄。宗憲仰藥死。六月，不雨。秋七月，詔罷江南加派兵餉。八月癸亥，裕王第三子翊鈞生，是爲神宗皇帝。總兵楊照出塞襲敵，中矢死。副將線補袞力戰，斬二百餘級，還其屍。九月，廢伊王典樸爲庶人。方士趙添壽獻法祕，賜冠帶，賑徐州。冬十月九日乙未，宣大報敵東行。兵部尙書楊博檄邊將爲備。丙寅，攻陷牆子嶺，擁衆大入。丁卯，屯平谷，掠通州，促勤王兵。以總督江東統之。命文武大臣分守城門。鎮遠侯顧寰集京兵分布中外。以劉漢護山陵。馬芳衛京城。戊辰，薊遼總督楊選尾虜至。姜應熊等兵次第至。總兵胡鎮大戰於通州，裨將孫臍死之。獲首虜甚衆，敵乃北去。甲戌，江東率諸將邀擊古北口，斬獲無算。丁丑，追逐出塞而還。京師戒嚴。逮楊選及薊州都御史徐紳下詔獄。選棄市。紳削籍。餘敘功陞賞贈廕有差。壽恩宮成。十一月，城張灣。十二月，琉球入貢。

四十三年甲子春正月。選民間女三百人入宮。二月。伊王典模發高牆。國除。戚繼光勦閩殘倭。悉平之。閏二月。禁王府宗室私置田宅。三月。扶溝民盧欽獻其孫女。納之。夏四月。大雩。五月壬寅朔。日有食之。西番入貢。建太素殿。六月。西域貢獅子。廣東兵大破倭於海豐。秋七月。賑淮安。冬十月。采方書。御史回京。俱陞侍讀。學士賜第。罷寶源局鑄錢。十一月。南御史林潤劾嚴世蕃羅文龍。逮世蕃文龍下獄。察京官鄒懋卿削籍。安南入貢。十二月。南韶賊馬五作亂。討之。尋平。是歲。天下進祕方及靈芝仙桃白鹿兔鴈等物者。不可勝紀。上皆厚賚之。如鹿兔生子龜生卵。御幄得桃諸事。羣臣皆表賀。亦不可勝紀。

四十。四年乙丑春正月。賑京師畿內饑民。丁未。景王薨。無子。迎葬西山。大覲考察。三月。千步廊火。壬子。策士。賜范應期等進士及第。出身有差。選陳經邦等二十八人爲庶吉士。辛酉。嚴嵩削籍。籍沒。子世蕃坐謀反。市斬。夏四月。四川龍川酋薛兆乾叛。討擒之。密諭輔臣欲禪位裕王。徐階進言。祖宗原無此例。前代亦非美談。惟有舉行冊立。攝行政事。斷自聖心。使恩出自上。乃可耳。上意不許。而議亦遂寢。五月。夷自浮海入貢。方士藍田玉胡大順矯誣論死。丙午。上還宮。六月。金芝產睿宗原廟。命作玉芝宮。秋七月。四川盜蔡百貫反。討平之。辛卯。建毓德宮。九月。鑿新渠。編畿南流戶入籍。冬十月。主事海瑞力諫。上怒。命下詔獄。上復諭內禪。輔臣力諫。罷。十二月。續修玉牒。

四十五年丙寅春正月。敵犯宣府。邊將禦之。乃去。二月。諭幸承天。不果。三月。土魯番入貢。夏四月壬戌朔。日有食之。濬九門河渠。六月。修太學。命有司不職者不得改教官。秋七月。詔求大玉補六璽。誅妖人李福。

達孫李同八月作紫宸宮九月修顯陵更建龍飛殿嚴禁戒壇僧尼說法冬十月敵入偏頭關大掠尋去湖廣災免屯糧十四萬宥沈束發爲民丙戌上不豫閏十月上不豫雲南討鳳繼祖平之十一月上不豫十二月庚子上大漸入大內午時上崩於乾清宮壽六十輔臣徐階等啓裕王入主喪事辛丑遺詔曰朕以宗人入繼大統獲奉宗廟四十五年深惟享國久長累朝未有乃茲不起夫復何憾朕奉列聖家法皇考身教一念惓惓惟敬天勤民是務祇緣多病過求長生遂致姦人乘機誑惑禱祀日舉土木咸興郊廟之祀不親日講之儀久廢旣違成憲亦負初心邇者天啓朕心方圖改櫛而遽爾嬰疾補過無由每一進思惟增愧恨蓋愆成美端仗後賢太子裕王仁孝天植睿智夙成宜上遵祖訓下順羣情卽皇帝位勉修令德勿過毀傷諸凡祔葬悉稽舊典其建言得罪諸臣存者召用沒者卹錄錮者卽釋方士人等查照情罪各正刑章詔告天下咸使聞知明年正月上號諡曰欽天履道英毅神聖宣文廣武洪仁大孝肅皇帝廟號世宗三月葬永陵

史官贊曰庸人之於親力所可盡盡焉矧天子耶博施備物大孝不匱思禮志之夫迎立之詔豈真武宗筆摛詞者實茲二三大臣若直書云朕纘服大寶青宮尙虛眇德負隱孝宗緒繼謹遵祖訓兄終弟及之文咨爾興世子厚燧入繼孝宗勉抑至情永承鴻業卽以益王第二子厚炫爲獻王後若不能割愛就義則有益世子厚燁在帝必於開讀之日徘徊驚慮有以處焉諸臣識有未明議有未豫一則曰倫序當立再則曰入嗣帝位夫人違親就撫事有或然及太阿在握乃逆使遺親斷不能得之於庸人而況英主臣

之失也。帝何郵。帝方欲盡博施不匱之思。而臣拂之者屢。幾從容婉諭。而下持之愈堅。又臣之失也。帝何郵。雖然。當雷霆之威。伸憤鬱之氣。卽太虛猶然也。詩云。十月肅霜。霜之嚴物也。曰肅。禮未成不得不嚴。禮旣成而終嚴焉。肅也者。其譏之矣。至土木雲舉。萬姓食勞。喜怒躋情。忠直飲刃。權姦婪弁。用之不疑。方士異端。尊之過制。帝亦莫自解矣。臣乎何郵。嗚呼。迹其初政。雖古先哲王。奚多讓焉。

明書卷十五

本紀十二

穆宗莊皇帝本紀

帝諱載坬。世宗第三子也。母康妃杜氏。於嘉靖十六年正月二十二日。生上於宮中。及羅罕盤。第取龍旗玉印奉世宗。世宗獨心異之。己亥二月。與莊敬太子景王同日冊封爲裕王。是日五色雲見。太子冊寶誤送上所。世宗聞之。嘆曰。天命也。莊敬薨。中外係心焉。上凝重秀朗。意氣豁如。世宗惑方士二龍不相見之說。召見頗稀。有司以立儲請。世宗不懌。自後羣臣無敢言者。壬子。出閣講讀。立妃李氏。出居於裕邸。凡十餘年。妃薨。繼陳氏。上在邸第。小心敬畏。動遵禮法。禁戢左右。無敢肆者。性寬仁。周知民情。景王就國薨。世宗無他子。人心大定。世宗欲內禪不果。丙寅十二月庚子。世宗崩。立召上入主喪事。辛丑。頒遺詔。壬子。上卽皇帝位。頒詔大赦。改明年爲隆慶元年。癸丑。釋海瑞於獄。甲寅。命改隆慶大統曆。

隆慶元年丁卯。春正月。上大行皇帝號諡。己未。加上孝潔曰恭懿。慈睿安莊相天翊聖肅皇后。孝烈曰端順。敏惠恭誠。祇天衛聖肅皇后。上生母康妃杜氏曰孝恪。淵純慈懿。恭順贊天開聖皇太后。丙申。詔復召對舊典。令科臣隨入錄建言得罪諸臣。通政使樊深等三十三人次第起用。是日。擢復原官陳瓚海瑞等。

十四人。第建言諸臣戮死者爲一等。贈廕諡祭。兵部員外郎楊繼盛等四人。杖死者太僕卿楊最等十三人。復職贈廕。繫獄戍黜死者侍郎唐胄等二十八人。皆復職贈官有差。吏部尙書熊浹諫止仙箕。御史楊爵彈擊權倖。與杖死者一例。議祔廟止一帝一后。著爲令。復鄭王厚烷中尉勤熨父子爵。罷西苑督農尙書。追奪邵元節陶仲文官諡。方士黃金等論死。考察京官。放廠軍歸伍。鄢懋卿遣戍。二月。祭社稷。罷金海神祭。加元妃李氏諡曰孝懿皇后。冊繼妃陳氏爲皇后。詔革諸匠役官職。工部尙書匠役徐杲等。卿二人。參議員外五人。鴻臚光祿等官一百餘人。各歸原管。仍爲匠役。乙巳。加諡長子爲獻懷太子。次子爲靖悼王。減內府供應。三月。修乾清坤甯二宮。壬申。葬世宗於永陵。孝潔孝恪遷祔。專祀孝恪。皇太后於神霄殿。孝懿皇后祔享。專祀孝烈於宏孝殿。革王大任姜倣等職。壬午。冊貴妃李氏等。毀紫極宮。命建翔鳳樓。以言官諫卽罷。敕修世宗實錄。夏四月。追贈王守仁爲新建侯。停進珍禽瑞獸。丁未。御經筵。詔正一真人不準世襲。革其真人號。奪印。五月。復前大學士楊廷和等十三人官。頒詔外國。辛巳。親祀方澤。六月。釋高牆禁錮庶人。秋七月。復李默原官。予祭。遣官分祭諸陵。闕里。及帝王陵。山川。朝鮮使臣乞留觀。幸學。許之。八月。上幸太學。謁先師。召譚綸戚繼光入京。戊子。親祀社稷。九月。敵入薊鎮。掠昌黎及畿輔。尋去。冬十月。尊遼王道號及真人印。十一月癸亥。郊奉皇考世宗配。詔改隆慶殿爲慶源殿。隆慶州爲延慶州。十二月。詔

廷臣博訪人才。修玉牒。罷提督團營內官。鄭王厚烷復國。

二年戊辰。春正月。大覲考察。減內府加增米四千餘石。二月。祭太社太稷。歲以爲常。乙酉。耕籍田。丁未。上

如天壽山謁陵五日還宮三月辛酉册立皇太子詔赦天下策士賜羅萬化等進士及第出身有差選李長春等三十人爲庶吉士丙子上幸南苑悔之卽還遣內官蘇杭織造夏四月追陶仲文所請元祐宮田八千七百餘頃還官許國子生郭禹收葬其父郭希顏五月命戚繼光練兵薊州詔選烏銃手三萬於浙準王守仁世襲伯爵丙寅有事於方澤六月廷臣疏乞正中宮體上曰皇后多病移別宮以遂優游耳爾等不知內廷事妄言之疾愈卽還乾清無多談秋七月復誠意伯世延爵盜竊太倉銀冬十月以嚴世蕃遺產充南贛軍餉遼王憲爝不法廢爲庶人發高牆內官張進朝請敕選宮女上怒下獄擬斬十一月敵犯宣府馬芳迎擊於長水海破之考察京官免江西糧太監李芳以直諫忤上命錮於獄戊辰冬至郊十二月有司奏災異詔曰朕夙夜憂惕不敢怠荒惟爾臣工務實心體國共圖消弭以仰承仁愛之意三年己巳春正月二月廢輔國將軍厚燦爲庶人發高牆築沿邊烽臺三千座成荆世子常冷淫縱降爲庶人庚子祭朝日壇賜衍聖公孔尙賢敕統束家衆三月陝西荒盜起廣西討宜山獐賊破之廢靈邱王甬鏞爲庶人海賊曾一本自倭入寇殺參將耿宗先等廢景陵王載塲爲庶人夏四月遼陽副總兵李成梁奏捷選民間女三百人入宮取太倉銀十萬入內開湖廣竹筒河五月御史詹仰庇諫內官營造淫巧杖爲民辛未有事於方澤六月廣東官兵擒殺宗先叛將周雲翔誅之閏六月秋七月修重城詔停造鰲山燈八月壬寅親祭夕月壇戊申祭太社稷廣寇曾一本平各王府建宗學內旨宥總兵田世威等立功辛卯上大閱武於教場九月詔舉邊才冬十月補京營軍足十萬十一月甲戌冬至郊十二月命廠衛餉

伺百官汰錦衣官旗一千餘人。工匠二千四百餘人。

四年庚午。春正月乙巳朔。日有食之。二月。湖廣土官覃璧及四川蠻阿大等叛。盡復夏言原官。予祭葬。贈諡。濬吳淞江白茆塘。冊英妃魏氏等五妃。貴州安國亨叛。官軍討之。敗績。三月。禁天下聚徒講學。鑄隆慶通寶錢。裁南京冗官。夏四月。敵犯山西。拒卻之。五月。給事中李已諫買金寶杖繫獄。尋釋。六月。詔戒酷刑。秋七月。免昌平州養馬三年。八月。城通州河西務。削陸炳職籍其家。賑陝西。免畿南秋糧。冬十月。俺荅孫把汗那吉率屬來歸。命設教習勳胄館。以京營大臣主其事。考察京官。俺荅擁衆索那吉拒卻之。尋納款。十一月己卯。冬至。郊祀圓丘。十二月。敵執我叛人趙全等來獻。受俘。賞賚有差。遣那吉歸。

五年辛未。春正月。大覲。考察廷臣及來朝官。謁皇太子於左順門。二月。冊封皇四子翊鏐爲潞王。遣內官往陝西督造羊絨。三月。冊封榮妃王氏等四妃。策士賜張元忬等進士及第出身有差。選趙用賢等三十人爲庶吉士。己丑。封俺荅爲順義王。通貢市。夏四月。命江西燒磁器十二萬有奇。五月。敕廣西古田平寇功。李遷俞大猷等陞賞有差。六月。三邊通貢市。順義王俺荅入貢。執叛人趙宗山等來獻。秋七月。上御殿賞俺荅及其妻彩幣銀物有差。八月。開泃河。九月。按撫遼人使各有甯土。勿得渡海入山東。詔定薛瑄從祀孔廟。詔廷臣集議海運。冬十月。安國亨求降。許之。西夷貢馬。十二月。遼東總兵李成梁奏捷。陞賞有差。六年壬申。春正月。詔雲南廣東探珠寶。二月甲午。皇太子冠。倭寇廣東。閏二月。選東宮輔導官。三月戊子。皇太子出閣講讀。廣東兵擊倭。破走之。夏四月。建瓜州閘。免湖廣秋糧十九萬有奇。五月。賜順義王俺荅。

鍍金銀印。先是上御門忽眩仆。輔臣高拱張居正共上殿扶掖。上蘇。握拱手曰。我祖宗至今。國有長君。社稷之福。東宮尙幼。奈何。拱對曰。皇上萬壽無疆。何出此言。上曰。有人欺朕。拱曰。何人無禮。有祖宗法在。良久。上曰。何事非內官敗壞。因攜拱手至乾清宮寢殿。升榻曰。朕一時如此恍惚。又曰。自古帝王後事。語低因不聞。須臾拱等出。漸平復。至二十五日己酉。上大漸。申刻。召高拱張居正高儀入乾清宮寢殿。上已昏。時皇太后皇后太子在前。於是太監馮保以白紙帖授皇太子。稱遺詔曰。朕嗣祖宗大統。今方六年。偶得斯疾。遽不能起。有負先皇付託。東宮幼小。朕今付之卿等三人。同司禮監。協以輔佐。遵守祖訓。保固皇圖。卿等功著社稷。萬世不泯。拱奏曰。臣受皇上厚恩。誓以死報。東宮雖幼。祖宗法度昭然。望皇上毋以後事爲憂。遂哭而出。庚戌卯刻。上崩於乾清宮。壽三十六。先是拱立恭默室候動定。有張居正吏姚曠持寸封甚密。拱問何爲。曠答曰。與馮公公。拱遂問居正何言。居正惶怖曰。乃遺詔事宜。辛亥。保復捧出一紙曰。遺詔與皇太子。朕不豫。皇帝你做。一應禮儀。自有該部題請而行。你要依三閣臣并司禮監輔導。進學修德。用賢使能。無事怠荒。保守帝業。秋七月丙戌。上號諡曰契天隆道淵懿寬仁顯文光武純德宏孝莊皇帝。廟號穆宗。九月壬寅。葬昭陵。

史官贊曰。鱗生萬歷中年。去穆宗時最近。每雜田間。研論農務。聞故老言。穆宗時天無水暵。餘糧棲畝。首目不睹。戈甲每飯飽午寐。酣足而寤。日未昃也。所謂化國之日。舒以長非耶。及覽中祕琬琰。謂帝純粹寬仁。穆然恭己。制節謹度。至不經之祀。無用之作。非藝之征。無名之獻。皆罷黜若將浼焉。嘗食驢腸甘。左右

請詔光祿供之。上曰：若爾則必日殺一驢以備用。朕不忍也。衣食供御必裁取最約者。其恭儉好生惡殺如此。言官觸忤。雖震怒終必釋之。且留心邊務。穹漠之長。慕德來王。峒林之孽。俛頭就縛。卽古之鳴鍾清渭。懸首北闕。未足喻其烈也。有肅宗之震厲。不可無帝之如天如海。以包育之。雖享國未久。規模宏遠矣。

明書卷十六

本紀十三

神宗顯皇帝本紀

帝諱翊鈞。穆宗莊皇帝第三子也。母選侍李氏。生於嘉靖四十二年癸亥八月十七日酉時。李氏後進封貴妃。是爲孝貞皇太后。先是穆宗長子次子皆殤。而弟景王亦未幾薨逝。本支未樹。中外以爲憂。世宗雖諱建儲。然無時不勤貽謀之慮。及帝生甚喜。當時穆宗久居藩邸。以潛時乾惕之厲。登極之明年。卽冊封爲皇太子。又明年。出閣講讀。無間寒暑。從來儲訓。未有若是之豫者。帝聰明寬大。動必中節。隆慶二年三月。旣冊立。偶遇閣臣於御道西。正立召謂曰。先生良苦翼贊。輔臣頓首謝曰。願殿下勤學。答曰。方讀三字經。旣而曰。先生且休矣。睿晉清暢。聽者悚悅。方十歲。穆宗恭妃遣人持金壺遺其家。爲闈者所邏。奏之。帝乃以百金進妃曰。家貧濟以此。此先朝藏器。不可出也。一日文華殿礎忽有天下太平四字。深入不滅。廷臣以爲瑞。帝不懌曰。僞也。從古天書之僞。善惑人主。往往如是。長而天表嚴重。廣額豐頰。龍行虎視。目光四射。指顧生威。臣下觸諱者。輒含容不爲動。喜作楷書。晚益精進。天性至孝。奉仁聖慈聖兩宮備至。帝冲年禁中花發。召輔臣賞宴。廷臣偶言及仁聖。輒起往迎。賞宴甚歡。一切典禮。備極尊崇。每上冊寶。飭拜甚

恭其儀。註皆出帝手。臣下莫及。隆慶六年六月。卽皇帝位。詔以明年爲萬歷元年。詔赦天下。上大行皇帝尊諡。上兩宮徽號。太后陳曰。仁聖皇太后。生母李曰。慈聖皇太后。帝御平臺。召對輔臣。部院官。問陵寢及治安之要。諭邊臣。謹備敵勿懈。戒諭文武羣臣。捐私爲公。以奏治平。諭擇經筵官。酌定朝講日期。定三六九爲常朝儀。山陵禮成。禁誥敕體誇侈溢美。大學士張居正進帝鑑圖說。上嘉納之。安置黔公沐朝弼於南京免死。

萬歷元年癸酉。春正月。命具經筵儀。上出乾清宮。見一無鬚男子。惶走。縛之。詞連大學士高拱。是日大風黑霧。刑官知其誣奏。送朝鞫。已暗。遂斬於市。二月。嶺東平。俘斬賊首蘭一清等一萬二千二百有奇。捷敘賞賚有差。夏四月。秋七月。命諸司章奏及時覆行。冬十月。兀堂等乞質子。所在易鹽布。遂許市。十一月。築邊堡。

二年甲戌。春正月。西南夷都蠻平。所俘誠四千有奇。拓地四百里。得酋王三十六人。獲武侯所遺銅鼓九十三而還。二月。會試天下貢士。取三百五十名。三月。廷試。賜孫繼皋等進士。及第出身有差。上命吏部引天下廉能官。赴會極門。面加獎賞。夏四月。重修太宗實錄成。秋七月。冬十月。遼東大捷。十二月。命書繪天下疆域及公卿而下郡守。而上文武羣臣姓名於御屏。罷年遠親盡之廢。

三年乙亥。春正月。二月。申飭史職。夏四月。敕吏部。凡天下提學官。非方正博聞之士。宜勿遣。夏四月。敵犯大甯。官兵禦走之。秋七月。九月。北京重建貢院成。冬十月。上親灑宸翰。賜各講官。十一月。王杲糾敵犯邊。

東夷長王台擒獻詔磔之加台龍虎將軍

四年丙子春正月二月建三屯營城夏四月命重修大明會典秋七月八月以水旱詔免田租敕有司加意牧養九月命民應賦粟改折銀實公帑寬民力冬十月防邊

五年丁丑春正月朝覲考察二月會試天下貢士取三百五十名三月廷試賜沈懋修等進士及第出身有差命考試下第舉人準署教職仍許會試夏四月五月詔修慈慶慈寧二宮以聖母諭罷六月嶺西羅旁平俘斬四萬二千有奇宣捷定大婚吉期秋七月九月以首輔張居正奪情杖翰林編修吳中行等冬十月大內火十一月世宗實錄成

六年戊寅春正月行大婚禮遼東大捷上行冠禮三月大婚禮成敍遼東功陞廕賞賚有差夏四月秋七月冬十月命刊宗藩要例書

七年己卯春正月二月河工告成三月烏思藏僧鎖南堅錯求通貢許之更定太廟祝文之稱夏四月詔停鼓鑄以大水詔減蘇松織造緞疋五月蠲天下逋賦一百餘萬命止徵見年餘悉蠲免秋七月冬十月趙鎖羅骨窺邊禦之遁去

八年庚辰春正月朝覲考察二月會試天下貢士取三百人三月廷試賜張懋修等進士及第出身有差夏四月上躬耕籍田秋七月詔大度天下土田冬十月敵犯驪陽官兵禦之敗走十二月敍紅土城功封總兵李成梁伯爵餘陞廕賞賚有差穆宗實錄成

九年辛巳春正月命翰林官分番入直侍上質問書義陳說治理如唐宋故事二月旌武義孝子王世名夏四月遣官賑江北饑民六月申飭朝儀服色秋七月詔優禮耆碩分遣官問民疾苦養老冬十月十一月命羣臣觀宣宗元兔圖賦詩成者三十五人

十年壬午春正月夏四月浙江兵亂都御史張佳允計定之六月丁亥朔日有食之秋七月山西大荒遣官賑之八月皇長子生詔告天下冬十月大破敵於曹子谷斬首千三十九級

十一年癸未春正月朝覲考察二月會試天下貢士取三百六十人三月廷試賜朱國祚等進士及第出身有差夏四月選庶吉士陳經邦等二十八人五月加上兩宮皇太后徽號仁聖加康靖慈聖加明肅六月起用謫外翰林官秋七月詔減浙江織造八月上躬祀山陵十一月隴川土目嶽鳳合緬甸叛分攻騰衝永昌官兵討之命折漕糧三分之一十二月阿台大舉入犯官兵禦卻之斬級二千二百二十二海西獻捷賞賚有差

十二年甲申春正月潞王出府成婚夏四月詔恤故輔臣張居正母秋七月敵窺邊防之冬十月以王守仁陳獻章胡居仁從祀孔子廟庭

十三年乙酉春正月夏四月詔減江西燒造磁器五月以大早上步禱南郊詔免天下災傷今年田租之半六月慈甯宮成秋七月申禁貪墨之吏八月皇太后御新宮內外賞賚有差九月四川松茂番作亂官兵討平之冬十月

十四年丙戌春正月朝覲考察。敕科臣摘參考成。二月大學士申時行等請冊立東宮。不報。會試天下貢士。取三百五十人。三月廷試。賜唐文獻等進士及第。出身有差。夏四月。詔減蘇杭織造。停罷江西磁器。五月。考選李啓美等爲庶吉士。秋七月。天下水旱異常。命有司設法賑之。冬十月。命北方開水田。十五年丁亥春正月。東阿盜起。官兵撲滅之。遣官賑山西饑。敕撫按禁遏糴。夏四月。羣臣再請建儲。不報。重修大明會典成。秋七月。冬十月。詔修決河。冬十一月。那林孛羅犯邊。禦之。十六年戊子春正月。二月。御經筵。三月。國子監司業王祖嫡請復建文年號。改修景帝實錄。上是之。黃梅賊梅堂等作亂。官兵進討。蘄州判官陳策死之。尋擒斬解散。悉平。夏四月。直隸浙江大饑。遣官賑之。嚴覈雲南功。閏六月。播州楊應龍進大木。賞賚之。秋七月。九月。上幸石景山觀渾河。詔修黃河。護陵寢。冬十月。卜奠犯邊。官兵禦之。

十七年己丑春正月。朝覲考察。二月。會試天下貢士。取三百五十人。三月。廷試。賜焦竑等進士及第。出身有差。夏四月。大學士王錫爵等請視朝建儲。不報。五月。考選王宥堂等二十二人爲庶吉士。秋七月。命有司恤災傷。申明憲規。冬十月。禮官請舉禘祭。十月。播州宣慰使楊應龍反。命官兵討之。十八年庚寅春正月。上見皇長子於羣臣。夏四月。六月。夷入陝西爲市。命嚴防之。秋七月。九月。詔停刑。冬十月。廷臣合詞請冊立東宮。不報。十一月初。命科臣察覈九邊兵馬城壘。揚州大饑。敕有司賑恤之。十九年辛卯春正月。夏四月。騷台住補貢。命厚恤之。秋七月。冬十月。命勘災荒。設法賑之。

二十年壬辰春正月朝覲考察二月寧夏土達哮拜反命官兵討之會試天下貢士取三百人三月廷試賜翁正春等進士及第出身有差懸購哮拜賞格夏四月命將出師援朝鮮五月考選王象節等爲庶吉士秋七月冬十月寧夏平奏捷十一月磔哮承恩等於西市蠲寧夏田租敘賚有差十二月上憫東征將士發帑金十萬犒之江西大旱命賑之

二十一年癸巳春正月平壤大捷大學士王錫爵請立東宮諭需後上命並封三皇子爲王羣臣爭之不報夏四月秋七月星變命羣臣修省冬十一月上召對廷臣於煖閣論以冊立俟嫡之意

二十二年甲午命恤各省災荒二月皇長子出閣講學刑科給事中楊東明進饑民圖上納之三月河南進饑民所食鴈糞上覽惻然蠲是年田租仍發帑賑之秋七月增順天鄉試監生中式二十名冬十月命廷議日本封貢事

二十三年乙未春正月朝覲考察遣使封日本平秀吉爲順化王餘陞賞有差二月會試天下貢士取三百人三月廷試賜朱之蕃等進士及第出身有差夏四月考選高承祚等十八人爲庶吉士秋七月冬十月防西夷

二十四年丙申春正月夏四月楊應龍益橫改命官合五省兵討之冬十月

二十五年丁酉春正月湖廣苗亂命撫之二月復議東征夏四月遣總兵麻貴等征日本秋七月詔加兩京監生中式各十名冬十月楚民亂尋平之

二十六年戊戌春正月詔募江南水兵爲海運朝覲考察二月會試天下貢士取三百人三月廷試賜趙秉忠等進士及第出身有差夏四月考選黃國鼎等二十一人爲庶吉士秋七月冬十月安南進代身金人宣東征捷官兵悉還

二十七年己亥春正月獻倭俘夏四月勘東征功罪陞廕賞賚黜降有差秋七月冬十月旌孝子李文詠等

二十八年庚子春正月夏四月秋七月命廣天下解額有差冬十月十二月獻播州俘於闕下磔楊應龍等於市命重修文廟

二十九年辛丑春正月朝覲考察二月會試天下貢士取三百人三月廷試賜張以誠等進士及第出身有差冬十月冊立元子爲皇太子詔告天下大赦冊封皇衆子福王瑞王惠王桂王加上聖母徽號爲茲聖宣文明肅貞壽端獻皇太后遣官存問在籍老臣申時行等

三十年壬寅春正月夏四月湖廣進魚鮓惡詔奪布政使程正誼官秋七月冬十月防邊

三十一年癸卯春正月遣給事中夏子陽等封琉球國王夏四月秋七月冬十二月妖書事發上震怒命窮治之

三十二年甲辰春正月敍平播功總督李化龍等陞廕賞賚有差朝覲考察二月會試天下貢士取三百人三月廷試賜楊守勤等進士及第出身有差夏四月失文淵閣印命復鑄給五月考選賂從字等二十

二人爲庶吉士。秋七月。冬十月。

三十三年乙巳。春正月。夏四月。冬十一月。皇太子第一子生。是爲熹宗。加上慈聖皇太后徽號。增恭僖二字。詔告天下。覃恩大赦。十二月。徙寬奠新疆居民六萬餘口。散寄遼東各衛所。

三十四年丙午。春正月。夏四月。秋七月。朝鮮報警。命嚴防之。冬。長至日。南京民劉天敘等謀亂。擒磔之。日本復與朝鮮尋盟。上諭加意偵防。從其私款。勿問。清理賜田。

三十五年丁未。春正月。朝覲考察。二月。會試天下貢士。取三百人。三月。廷試。賜黃士俊等進士及第出身。有差。夏五月。考選林欲楫等十八人爲庶吉士。六月。特舉會推事。閏六月。發倉粟二十萬石。賑京師被水居民。冬十月。會議屯田法。

三十六年戊申。春正月。大學士葉向高請補缺官。不報。夏四月。南京科道官公請賑蘇松水災。從之。冬十一月。發內帑銀十五萬。賑江南。發兩淮鹽課銀十五萬。賑浙江。十二月。遴補宮寮。海酋入貢。

三十七年己酉。春正月。北敵窺關。挾賞。二月。廷臣請東宮出講。時輟講已四年。夏四月。大學士葉向高疏請增補閣員。不報。秋七月。詔增遼東解額。冬十一月。命官纂修玉牒。是年。倭并琉球。執其王。侵閩廣。命嚴飭以待。

三十八年庚戌。春正月。朝覲考察。閣臣請皇太子及諸王出講。讀。不報。二月。會試天下貢士。取三百人。三月。廷試。賜韓敬等進士及第出身。有差。夏四月。遼陽警報急。命官料理邊防。發帑金十萬。又中宮等捐銀。

五萬分遣官賑濟饑荒地方六月釋獄中輕囚秋七月冬十月輔臣請補戶禮二部官不報
三十九年辛亥春正月京察夏四月怡神殿災蠲直隸山西山東河南稅銀之半秋七月廷臣公請上升
殿不報冬十月皇極門興工十一月兵部奏請敍薊鎮宣大閱視功言諸臣多物故者不報
四十年壬子春正月夏四月秋八月以各省鄉試考官命不下皆改期冬十月考選官八月始命下各就
職

四十一年癸丑春正月朝覲考察二月會試天下貢士取三百五十人三月廷試賜周延儒等進士及第
出身有差夏四月都察院請差巡按御史不報廷臣請福王之國不報秋七月禁百官擅去職位考選會
楚卿等三十三人爲庶吉士冬十一月延鎮三捷十二月福王請減莊田詔嘉答之

四十二年甲寅春二月皇太后崩詔告中外三月上皇太后尊諡曰孝定輔臣請補科道官不報福王之
國河南夏四月詔減直隸稅額二萬六月山陵禮成

四十三年乙卯春正月夏五月有男子張差持梃入東宮闈者獲之奏送法司鞠審有謂風癲者有連鄭
皇妃者上震怒召羣臣於皇太后靈次令見皇太子諭以太子仁孝之意遂命誅差秋七月建州兵屯南
關預備之

四十四年丙辰春正月朝覲考察二月會試天下貢士取三百五十人三月廷試賜錢士升等進士及第
出身有差革會試第一名有弊舉人沈同和夏五月倭寇福建六月清河兵私出松山被掠饜蝗冬十月

賑陝西饑。是年。我太祖卽皇帝位。國號大清。改元天命。

四十五年丁巳。春正月。禮部議諡例。擬雍泰等四十四人。上從之。二月。套寇乞款互市。許之。貴州苗叛。官兵討之。皇太子出閣講學。皇太孫就傅。三月。考察京官。夏四月。畿輔旱蝗。蠲田租。封福王第一子由崧爲德昌王。賜印。五月。遣使冊封諸藩。六月。正陽門樓成。秋七月。命官勘山西旱荒。山東蝗災。賑之。八月。諭防邊。九月。命賑承天水災。命改折直隸屯田租糧。冬十月。寇犯喜峯。禦之。隆德殿災。延禧宮災。十二月。靈寶賊高二等作亂。擒斬之餘黨平。

四十六年戊午。春正月。夏四月。我清兵襲撫順。遊擊梁汝貴死之。閏四月。清兵歸漢人張儒紳等。齎番文請和。五月。清兵破撫安。以失城喪師。革巡撫李維翰。秋七月。清兵入鴉鶻關。直抵孤山。議徙寬奠人民於遼陽。徵兵往禦之。初。設援遼餉司官。九月。清兵破清河。下總兵麻承恩等於詔獄。十二月。大賞北關金台失等。

四十七年己未。春正月。朝覲考察。援遼徵調兵雲集。諭兵部議方略。頒賞格。二月。會試天下貢士。取三百人。三月。廷試。賜莊際昌等進士及第。出身有差。考選倪啓祚等二十三人爲庶吉士。遼東師潰。總兵劉綎等死之。五月。我清兵抵鐵嶺柴河諸處。秋七月。杪花寇十方堡。官兵禦之。遁去。清兵連破開原鐵嶺瀋陽。官兵禦之。熊官兒屯。以捷聞。九月。命贊善徐光啓以少詹事兼監察御史。專練京兵。冬十月。計遼餉至三百二十四萬金。運車三萬七千輛。牛七萬四千頭。十一月。我清兵入龍潭口。

四十八年庚申春正月我清兵抵遼陽三月以訛言京師戒嚴夏四月皇后王氏崩諡曰孝端五月召見輔臣方從哲於臥榻蓋深居三十年始有此召六月關陝永保援遼兵逃上發帑金三十萬招撫之秋七月二十一日酉時帝崩於乾清宮壽五十七八月丙午朔皇太子卽皇帝位上尊諡曰範天合道哲肅敦簡光文章武安仁止孝顯皇帝廟號神宗是年冬葬定陵

史官贊曰帝仁孝寬平享國最久絕晚近綜覈之煩而臻古聖幾康之理海內沐浴元化幾五十年百姓含鼓目不見兵革耳不聞戰伐途歌巷舞無愁歎之聲洵明運之邛隆矣初年精明英密臣下莫可測識晚頗厭怠深居靜攝幾三十年而權不下移亦可謂獨秉太阿者至慈護光宗始終無間宮闈之中了無慙德蓋不世出之主也第後來礦稅紛綸頗覺驛騷而懈弛之久邊釁漸生喪師蹙國不能爲帝解矣馮張初肆旋就闕除以號曰神真不誣云